

師伏堂駢文二種

師伏堂駢文卷

倉帝史皇氏頌

慮戲畫卦頌

舜陵銘

尙書大傳疏證自序

尙書中候疏證自序

史記引尙書攷自序

六藝論疏證自序

魯禮禘祫志疏證自序

兩漢詠史詩自序

宙合堂談古自序

鄉詩撫譚序

古泉雜詠序

清嘯閣詩草序

讀選樓詩集序

駁五經異義疏證自序

榆霞山館師友詩錄序

師伏堂駢文卷一

善化皮錫瑞

倉帝史皇氏頌

厥初生民未有文字系絕氏號之綴人傳混沌之術倨倨眊眊自  
以爲馬牛榛榛狉狉未遠乎鹿豕丹壺莫紀元中無記金符弗炳  
玉檢斯闕疊聞罕漫日月無以耀其光元混寂寥乾坤不能挾其  
奧不有寶炬曷開重幽苟非文明將遂長夜又自巢燧以後純氣  
漸離剝木之爭難憑默識結繩之治莫化澆頑乃牖天衷篤生倉  
帝惟帝生有睿德產而能書若俎豆之陳出於嬉戲荏苒之藝見  
夫岐嶷神奇靈異莫得而究矣若乃九頭前闔叶乎言教四目獨  
炯炤其靈光表並明之奇呈侈哆之象南巡上洛臨元扈以觀天  
獨步陽虛感青雲之扶日於是上天降之乃命靈龜負書而出丹

甲有煒青文斯煥帝甄茲靈貺拜受河圖鑿鑄明聰儀度晷緯屈  
曲懸象仰覽奎垣之精順環無端俯名物理之異鳥迹間撫始兆  
古文蝌蚪旁通非同繆篆爰乃權輿六體作憲百王形聲相參假  
借居後依類象物視狗知畫犬之形隨體辨名伏禾制禿人之義  
是知字者孳也相生而體勢繁書者如也取譬而竹帛著玉山冊  
府循而通明寶文經函紹以闡繹遂使形兆整焉號紀於云亭法  
式恆常度昭於書契銀繩瓊檢懸燭龍以照侗儻玉律金科耀陽  
鳥以驚瞶寐天地之精神變矣民人之耳目新矣聖矣哉文學之  
始其肇於通姓之初乎鴻蒙將闢鬼神乃牖其靈蟲鳥炫奇聖哲  
亦師其智始則倉書垂憲而神龜呈玉版之祥繼則羲畫開天而  
龍馬授瑤圖之兆終乃孔經定制而麟獸啟寶書之文傳之億齡  
懿此三聖作者惟帝獨開其先是故登封七十二君首推制作禪

通一十八姓丕冠侯岡或謂身爲史官乃非帝號不知無懷封岱  
早勒金泥炎帝御民已昭玉契此皆紀先疏佗代遠軒皇且黃帝  
時臣有容成氏乃同於古帝史有孔甲名亦協夫夏王安知帝軒  
之朝不更有倉氏之史乎或又謂摘奸者法法倣而奸生化俗者  
文文繁而俗薄奇它密網誰還樸鄙以焚符章句凝脂且憑詩禮  
而發冢聖死盜止審爲厲階鬼哭龍藏應傷竅鑿則是官禮誤世  
元公蒙新莽之辜讀書喪邦宣聖受湘東之責以鳴憤激奚解刻  
深今者尉律諷字皆帝之遺文學僮操觚盡帝之餘澤籀史斯篆  
比於孫子邈隸章草列爲曾元雖踵事增華不盡龍顏之製而尋  
枝顧本敢忘鳳翔之祠敝八會於金書含十華於玉券博攷乎李  
斯張敞杜林楊雄許慎所著咸述聖之功臣旁徵乎崔瑗蔡邕曹  
植索靖顧野王之言信稽古之帝者別裁僞體證末學鄉壁虛造

之非暉麗同文斥佞盧右行夷音之陋外臣不敏敢稽首拜手而獻頌曰

聖倉穆穆上繼庸成鴻荒肇開龍德挺生剖璞而耀燭幽以明瓠  
竅斯鑿草昧乃更綠字觀河丹書獻洛負比蒼龍銜同赤雀人厭  
屯蒙天垂制作道合神符靈通祕籙雨粟方應削簡遂滋江河聲  
合日月形規岫嶠摺逸石鼓獵奇秦廷灰燼魯壁金絲百官以治  
萬民以察煥章開矇易契鋤猾象魏昭文鴻生握札謬說軒臣虛  
談史頡體變千古義銘六書蠱皿測蟲丁枕參魚刻符摹印勒署  
刊爰孰簡而竊孰篋而肱穀穀斯冰孕育周孔華路首席庸名尸非  
偁鳳麟增輝蟬蠹遺種述古風微尋源義重德翊三陽治逾百年  
驂駕栗陸跨蹏麗連陽武都古倉垣壤偏造成師曠吹臺列仙利  
鄉峩峩遺蛻斯委九尺崇封千秋刺紙法施黎首靈相椎指日諱

丙寅拜同庚子說文撫許訓纂編揚爰厯博學滂喜凡將肅肅孔  
里沈沈未央彙肅隻義俎豆三蒼惟皇斯煌煌惟作乃聖大文弼彪  
萬嗣型鏡因提仰承柏皇繼正逸象肇開鸞龍爲盛上天作令皇  
辟迭王碑銘漢建石刻周藏寂寥世繫彷彿躋迄天生大聖淵哉  
史皇

慮戲畫卦頌

天墜未形馮翼洞燭氣始形始質始兆乎渾淪太初太始太素先  
以太易九變復貫剖判元黃萬彙品生權輿太極是知天地統於  
陰陽陰陽妙於變化乃自九頭前闔五龍繼治循蜚合雒此祕夫  
觀吉夷几邁斯文尙曖雖巢燧漸宏制作懷葛早耀升中而皇策  
弗乘神蓍未得十言之教何其闊歟於是蒼牙通靈毓聖皇雄之  
氏華胥感虹降神仇夷之地木德應運春皇挺生牛首龍身誕此



奇表珠衡日角穆乎睟容龍紀命官鳥明佐治含養蠢化枕方寢  
繩儷皮修儀則蜎蠕知別田獵率眾則蹄迹歛芒立禮教而造干  
戈變茹腥而去巢穴固已八區合照百王讓先矣而其通神明類  
萬物者則尤在畫卦焉於時開闢以來世歷九紀禪通之代姓易  
十七菁華欲啟造物假於聖神苞符肇開孟河呈其龍馬鱗文旣  
獻象數斯炳皇乃震動役其神思近協身度遠挾物蘊俯仰法象  
刻畫羽毛乃作八卦因而重文是爲開天之畫以極探蹟之妙假  
智靈草覽兆介蟲七十二鑽之龜元王通其夢十有八變之筮巫  
咸善其占飛伏變易匪幽弗窮消長吉凶靡奧不洎俾天地無淪  
於虛器陰陽不墮於渺微非天下之至神孰能與於此乎丕休哉  
獲麟制作無負弗挾獨絕彼韋編而鐵撾三折祖龍窮殃有壁莫  
藏獨歛彼炬火而筮書彌彰江東馭臂施於京費胡以戰國之昧

昧而薪傳斯貴先歐旄頭召夫梁丘胡以漢廷之羣昧而筮應是  
求洪荒夢夢賴茲神聰靈著叢叢秀風陵之中末世瞠瞠師其餘  
智稽疑命筮受先聖之賜固宜索隱補史之筆獨冠蒼精溫公稽  
古之篇肇端太昊也遂作頌曰

太極之元渾敦齋漆兩儀是生四象出焉唯吁侗蒙彌億萬年雖  
樹元陳樞而圖書未宣履迹生犧同符姜嫄日月重輪乃畫坤乾  
貞卜者龜負圖惟馬身辨鱗采賂耀汗赭蘿圖爰瑞而蒼昊錫嘏  
寶爰呈文而訾黃來下生瞽倚數觀象應樞兩地合契參天剖符  
謂帝不重卦吁彼瞽儒亦有博士云燧皇之圖未耨交易剡木弦  
弧舟楫杵臼宮室契書萬象駢羅取之裕如何取彼離卦獨用夫  
畋漁豈留此祕藏以永乎古初連山歸藏玉門演文八索旣出十  
翼斯繁子雲沈思默而太玄元包潛虛擬經益紛徒勞架屋而終

闕皇墳莫洞乎帝之藩卦氣爻辰世應納甲見仁見智元本殫洽  
陰陽五行謬託龜筮鬻技術術取義尤狹實盜乎帝之法虞夢吞  
爻爲漢續傳王侈清言爲宋導原造爲龍圖乃名先天數學皇極  
道家陳搏曷窮乎帝之淵圖則九重孰盡其象大瀛無涯孰極其  
廣浹遐洞冥察來彰往人矜淵微每墮忽慌十日甲歷惟卦析之  
九州別宮惟卦飭之朝帝靈門千秋式之幽贊神明伊誰測之

舜陵銘

粵自二儀剖分五德代嬗巢燧元默肇開皇風鴻黃世及以一民  
紀然而行蹟視瞋未離倨眄之習佐昊相頊弗顯崛興之奇若乃  
兆飛躍於田龍煥文明於巢鳳終禪讓之盛美集煌諦之大成者  
其惟有虞氏乎在昔縱華感樞冀土毓懷珠之聖攝提應象姚墟  
呈握石之祥虹瑞旣彰龍顏斯挺黃精式炳丕揚星日之光元德

斯升大奠山川之理無爲崇夫至治不與仰其巍巍盡美又善無  
得稱矣若夫搜太史氏之軼遺擬庾仲初之像贊揆張瑞應撫祕  
錄於緯文標準卷婁屏卮言於傲吏使荃宰有寄神謨斯在則亦  
有可徵者焉夫鳴鷄朝日不皆累聖相承掇蜂履霜未見感天有  
驗乃于田一號井廩再厄大杖弗受兩笠空扞雖龍工鵲裳資謀  
二女而牧牛表虎早愿諸難聞鳩感恩旣極窮人之瘁占鳳舐目  
乃致頑父之夢引愿彌重底豫乃孚爰舉服澤之陽遂殫天下之  
養而齋夔唯謹猶載旌朝庠象就封若忘謨蓋此則帝之孝也古  
之席蘿圖拱松棟莫不亭毒鶉居之眾挺捫蝸動之民而帝則當  
龍潛早有癰行均傳虛之貴賤化坻畔之侵爭厯山祠田祝四海  
之俱有雷澤鑿瀆務天下與同利是以士就士悅邁亶父之遷岐  
成邑成都踰孰哉之啟國人慕如蜺化馳若神豈待薰風撫絃始

解民愠元日格祖乃服蠻夷此又帝之仁也水火不損其真風雷弗迷其性王皆不死天命有歸於是五老告期謂黃姚爲知我長人感夢表赤龍之負圖綠色臨壇青泥授帝示紀錄興亡之數顯殷周秦漢之符至乃山車垂綬乘黃服阜蓂莢生陛景星耀房休氣四塞始彰賜璽之來慶雲蒸蒸終兆褰裳之去此又帝之神也桑陰不違柴望斯薦名授大任實投鉅艱斯時也人戴魚頭國交鳥迹槽巢已革而壤少平居蘆灰久填而水仍泛溢帝乃升聞弗震歷試罔驚百蟲將軍掌火烈澤黃熊嗣子刊木隨山災澹滔天民欣宅土璿璣齊政車服庸臣四目四聰廣其明聽八元八愷贊斯平成永五十載星陳之輝宏十二州風動之治瑄呈白玉蓋地來西母之圖壇起赤光巡洛受南山之錄此又帝之聖也帝堯倦勤醜類方熾驩頭比黨惡物劇於龍蛇舉尾爲旌毒民烈乎猛獸

五刑既制四罪咸孚備懲共驩苗鯀之辜遂變蠻狄戎夷之俗鳥  
喙作士襄茲明刑羊角觸邪助此弭教始猶嚴夫猾夏繼乃化以  
無誅畫衣之懲憚於肆市舞羽之化威過移師予正罔干不仁者  
遠此又帝之武也梲俎兩敦祭鞞大旂四廟之制肇修五龍之駕  
肅舉奏鶴鶴之樂朱鳳方儀比蓂哉之謠元鶴斯舞日月作會麗  
於垂衣星辰有行華此復旦總期聽政早立明堂之基米廩名庠  
無忘畎畝之舊變悶悶於五紀啟郁郁於三代用使聞韶者忘肉  
味數典者先鸞車此又帝之文也然猶學蒲衣師單卷務成子附  
藉其一言雄陶方回引爲七友因塗髹而納諫嚴乃見其捐金立  
謗木以求箴旌更揚夫告善燕禮養老開攝几之儀麕衣無飾示  
茨牆之儉谷璧是抵罇盆亡臚草茹勿忘叢脞攸誠此又帝之恭  
也且夫揖遜之世蜚遁爲高壚口羞汙乃致絕友鼠腹易滿不能

代庖帝則與民同憂念世深墨辭山中之鹿豕席貳室之龍埳矜  
衣固有匪高箕顓之瓢黃屋非心豈慕昭華之玉南河避榮中國  
踐位總師格禹帥官遷虞百姓與能則還宮不辭八風循通則敝  
屣如脫天下非一人之天下授受取與無容心焉此又帝之大也  
懿矣哉執中一語開洛閩兩廡之傳明良再歌想喜起千秋之盛  
冠四代之器揭豆泰尊歌八伯之風朱于苓落後世有作弗及虞  
帝之隆放勳獨憂先賚敷治之舉授鉞彭蠡有元宮之祇承張樂  
洞庭疑黃軒之再出固宜匹夫而有天下勗振古未有之奇其咨  
而能俾以拯萬姓橫流之困朝覲訟獄弗歸乎丹朱親尊安敬獨  
推於元聖乃使南山歌者恨不逢時東鄙野人侈談盛德聲教訖  
于四海錫元圭者善必歸君聖德必祀百世賜楛矢者齊猶繼守  
豈同懷葛卷領文治未遑禹湯驟馳王猷已降者哉精華已竭黃

星靡鋒龍髯墮於鼎湖鳳吹息夫大麓百歲厭代乘白雲而至帝  
鄉九疑連綿隕素霜而寒輦路瓦棺示樸追上古之丕封葛緘崇  
儉比會稽之窆石或疑鳴條乃卒紀市有徵豈從蒲坂之都遙葬  
荆蠻之域不知雲陽古帝蓋處長沙祝誦遺墟猶傳衡嶽金天明  
聖遙封露水之鄉炎帝神靈遠窆茶陵之地况以帝之普天共戴  
交趾南通入十龍之門旁徵僊錄走逐鹿之馬奇撫真源神異之  
蹤詎必故都之戀乎迄今蒼梧聖蹟象亦能耕赤水神鄉雀猶銜  
土嵯峨韶石彷彿九奏之聲浩渺零陵未從三妃之葬望驂螭之  
並至湘浦波連思傲象之常來鼻亭壤接野森斑竹疑萌朱草之  
榮阜積珠塵恍致玉環之貢遂使太陽溪畔漢唐鐫其琬碑營道  
邑中春秋潔其瑤瑱千年虎豹畏軒皇弓劍之神萬里風雲接唐  
帝穀林之壝銘曰



循蜚易代紀鳳書年榛狁漸闢聲明未宣龍門遲鑿鴻水曼延殷  
憂啟聖異位推賢窮蟬世微有鰥師錫意感瑤樞精呈玉厯姚水  
挺生濟巖潛匿祕隱珍符戢藏鱗翼光光重華明瞳朗分下洞元  
景上燭天文方庭衡曰側陋興雲晚履帝位早稱都君帝惟參牟  
父乃瞽目號傷耕田泣悔糴穀篤謹匪懈陶漁奚辱積誠感神盡  
孝敦睦天授寶籙堯錫絺衣臣庶使治盲瑩來歸赤文龜獻綠字  
龍輝晷緯叶應天人弗違指麾夔龍揖讓黑虎凶族翦四帝臣登  
五掘地蛇驅來庭獸舞誰其嗣之惟元宮禹五等輯瑞三光察衡  
易俗以禮折民惟刑庭實玉帛異章巾纓府事允治山川咸平欽  
翼皇象彰施雌彝郊禘黻冕聽朝深衣獨遊巖廊萬物熙熙行衢  
龍馬司晨鳳鷄珠蝦貫胷祥烏三趾元都獻玉息慎稟矢民乃粒  
食帝猶劔簋諫鼓其鏜漆器非侈饗軒方舞笙篳俄遷蟠龍迅藏

蛟魚踊淵萬邦高謝一笑擁璿璣此尊位薦於皇天九原颺功大  
唐紹德玉燭調年非煙異色弗戀弗貪惟淵惟默道邁逃堯光高  
遜國蜺僑門食陰陽肫精悲纏紫極戀結滄瀛穀木襲殞金絲息  
聲同哀地坼空望河清龍輶遷塗虹綬委旆日寢衫衣雲低縞蓋  
野揚青砂水燦文貝神乃上僊魂非樂沛孤墳何是九山相疑陰  
冥隧道杳靄崇祠睿謨永閔靈蹟空垂大荒古經齋曰漢碑宵明  
靈光湘妃古淚有庫近封叔均同碑神所憑依市不易肆要服非  
遙橋山豈僞蒲津都遠巡狩臺荒鳳簫未歇龍藻斯藏邇際黃陵  
下瞰清湘千秋萬歲謳歌弗忘

尙書大傳疏證自序

自暴秦燔坑經義堙燬而易主卜筮詩存諷誦春秋未箸竹帛禮  
樂本無成書推原廢興匪咎煨燼惟尙書一經上紀五家邈乎百

篇末由再覩斯文未喪一老慙遺著錄本於秦官發藏先於孔壁  
五三六經之旨如日中天二十八篇之文比徧北斗若夫別撰大  
義不盡發明本經而歐張傳授皆出高足劉班略志首列傳名漢  
世四家言詩二戴述禮公羊經旨司馬史才考其記禮之辭多相  
出入序事之略亦堪證明是知山東之大師無若沛南之閎遠厥  
後東京祖鄭南宋宗朱懿彼兩賢師法百禩而六藝撰定特爲注  
釋儀禮通解多引傳文是則專家雖亡莫尋虎觀之緒四卷具在  
猶見鴻生之遺降逮元明競逞虛誕俗學蔑古委之榛蕪空言禍  
經烈於秦火近儒蒐輯古書不遺餘力而伏傳全本莫睹人間吳  
中略撫缺殘侯官復增校訂揆之鄙見尙有譌漏乃重加補正爲  
作疏證仿孔冲遠之例釋滯求通衍量家令之流暢微抉隱而皇  
能舊疏莫可據依摩詰古圖空傳仿佛拾遺訂墜有四難焉伏生

生自先秦多識古禮學興前漢是爲今文枝葉所嬗非止三家尙書符節相同通夫十四博士乃自紅休一出赤伏中興信列國陰謀之書用山巖疑似之說昧者遂疑今爲漢法古是周文素王之制定自太常六典之篇可概上古四輔匡主以爲周禮無文太子迎侯孰識異代之法今將祛此大惑紹夫顓門而曲臺逸文塵珠散失石渠議奏碎璧湮淪其難一也東京作章句必曲曲以敷陳西漢尙微言不字字而比傳江都之述繁露太傅之傳韓詩比於是編實堪鼎足乃或昧於古書之例徒以耳食自矜皋謨之言貢士必欲強通多士之論宮城亦思影附成王幼在襁褓不解甚言非眞梓材謂命伯禽務在寄鑿立異致爲此書詎病實由誤會傳文今將辨明體裁析解淆惑而譌謬沿襲或且強作調人摧陷廓清莫能比於武事其難二也漢通天人多出齊學詩說五際春秋

三科擬諸洪範之辭皆明災異之旨故自漢至隋並著於史良以  
五行之義自成一家之言宋人疾緯書如仇讐謂天變不足畏中  
候十八既詆讒言大法九章皆從棄置今將甄極志緯推明禹疇  
而河洛遺文無由鉤擿向歆異說亦匙折衷其難三也金絲既振  
乃有壁書門戶斯歧多遲胥臆鄭君既注是書自宜恪遵勿失乃  
詆歐陽爲蔽冒信衛賈爲雅材間下己意比於箋毛或易本文同  
夫注禮易曰容爲曰審變大交爲南交甘誓六卿解以周制堯典  
八伯義非虞官帝者之服五章天子之城九里皆由泥古不免獻  
疑近人併伏鄭爲一談昧古今之殊旨西莊之作後案阿鄭實多  
樸園之攷今文詆伏尤妄今將別漢司農之注守秦博士之傳而  
庸俗異視易謬元黃別定一尊莫分黑白其難四也錫瑞殫精數  
年易彙三次既竭駑鈍粗得端倪原注列鄭必析異同輯本據陳

閒加釐訂所載名物亦詳引徵冀以扶孔門之微言具伏學之梗概世有達者理而董之

尙書中候疏證自序

粵惟上古天與人近鳥師龍紀通蒼昊以名官馬圖龜書吐菝符而畫卦蹲龍之聖學於四夷則象之辭著於十翼良以紹天闡繹非帝王不能受其休靈契合符非神聖無以通其祕五德應運兩儀效珍渙汗綠篇細緼丹冊焚焚雉雉顯錄圖之奇炳炳麟麟揚蠡采之懿矣中候之文與書同出鄭君之論六藝以爲孔子定書百篇百二篇爲尙書十八篇爲中候是則淵源不二表裏互明上祧帝魁下訖秦穆非同禹貢別撰山經例以春秋宜存外傳超諸緯而獨出紀實爲多擬逸周之刪餘徵文尤信赤兕受命云放唐文白水興益尊內學禮堂寫定爲作注文篇辭奧蹟特加明闡

遂使榮光休氣暉麗三五之前玉檢金繩昭章千載之下晉儒闡  
忽惡說機祥疑繫辭爲僞書詆讖緯爲妖說摺擊注疏請刪五經  
之言罪狀鄭君奏罷兩廡之祀由是隋唐之志已云闕遺路史之  
後遂絕稱引祖龍虐餒更烈於秦焚鳳鳥河圖重興夫孔歎吁其  
惜乎或謂尼山明訓不語怪神天道幽微安有文字不知斬蛇沛  
澤共聞神母之號繼馬石文顯見討曹之句豈有靈怪符應可彰  
於漢魏休祥徵驗不著於唐虞又况龜龍之神魚鳥之兆具存經  
義匪獨緯文詎可以役徒狐鳴方士牛腹新莽之受神策公孫之  
據掌文青蓋吳亡勒崇天發之讖黃初魏纂紀瑞受禪之碑併爲  
一談誣及千聖室怒市色師王肅之疑經懲龔吹齋效隋文之禁  
緯或又謂聖人先見猶待蓍龜百世可知不過因革何以唐帝受  
錄已決湯武之興公旦視文並睹嬴劉之事不知亡秦者胡早徵

祕記當塗代漢寶兆先機後世如公明景純圖澄寶誌猶能推測  
豫卜吉凶矧至誠可以前知禎祥初非傳會政起胡破競傳演孔  
之圖摘洛鉤河不比閉房之記豈必神道設教隱開趙宋之天書  
帝命錫疇並疑胥餘之誑語耶謹據袁本參以玉函推原注義撰  
爲疏證明兩漢天人之學辨一孔目論之非所憾恣緯摧殘瑞圖  
泯棄東杼祕寶曾莫窺其藩籬北海遺書庶猶存其崖略爾

史記引尙書攷自序

漢京之學皆有師授龍門作史自述宗傳尙書一經獨不言所自  
出儒林列傳略可攷其由來其時鼂錯受書未遠年代歐陽立學  
已歷歲時上溯沛南大師當屬再傳弟子故其義皆古義而其文  
實今文贅儒昧經率意妄詆略陳其旨乃有六蔽自壁中蚪文謬  
託安國航頭逸字倏增方興唐頒學官寶此贗鼎守節正義司馬



索隱未能別其異趣猥云不見古文不知臨淮蚤卒並無著述之編麟止絕筆詎誌巫蠱之禍乃執豐坊之魯學輒詆毛詩信商英之三墳反疑周易此一蔽也宋儒好用義理懸斷事蹟見夫操胡天命謂西伯不稱王莽號宰衡謂元公無居攝因噎廢食詎曰能通懲羹吹齏將無過泥執彼目論繩夫舊聞詩人受命之文以爲盡妄世家當國之義皆曰厚誣此二蔽也漆書一卷本出西州古學數傳盛行東漢衛賈之所傳合馬鄭之所遵循舉周禮以概唐虞是末師而非往古唐東避亂未合機宜祖甲稱賢殊乖事實昧者見其抵牾乃加塗竄懸牛賣馬面目全非斷鶴續鳧參差不一此三蔽也漢書云遷從安國問故堯典諸篇多古文說班用夏侯之義本與歐陽不符孟堅之爲此言當時必有所據以今攷之但見堯典衡山字非作霍洪範曰睿文不從容然衡霍故有二名睿

容亦疑後改至若金滕用蒙恬之舊說微子以樂官爲太師非出古文義尤彰灼而淵如注疏守孤說而背顛門默深古微襲疑文而汨家法此四蔽也經生株守尠能博通不信漢書足攷廟制安知史記可證經文或云不見全本故有缺殘或云多採襍說咸非本義有能背俗而從古反謂信史而疑經豈知孔序初出已載簡編湯征逸文且入甄錄而少見多怪將疑腫背之駝以是爲非謬矜買璞之鼠此五蔽也史記一書或以故訓易經或由今文本異或因文便從省或是傳寫致譌而考其大旨皆可徵信近者通儒輩出罕知遷史足憑風雷改葬懋堂以今文爲謬悠反國攝王樸園疑伏生爲老耄豈知取證於史其說自明大孰未穫以前本有歷年之事相王行政之後初無遠避之文乃不援史文以證師傳反徇末學而違初祖此六蔽也錫瑞服膺伏書罔敢出入參攷太

史謂足據依甄所引用皆一字而千金據其闕遺亦零珪與碎璧  
徐裴張馬之說閒糾其違臧江孫段之書擇存其是以見書細石  
室實可證明聖經聲發金絲不同點竄舜典云爾

六藝論疏證自序

元聖綴學麟經始制三科九旨大義炳然厥後孟荀著書馬班作  
史皆述己意以詔後賢良以宗旨自發庶免燕郢之疑要略旣具  
可無鼠璞之誤北海鄭君網羅浩博衷其著述言滿百萬標舉閎  
旨猶多闕焉自序之篇止傳片羽六藝之論略見碎金論作何時  
書缺有間攷之公羊之疏乃在著書之前而簡莊陳氏不信斯說  
嘗舉注詩宗毛之語并及春秋孝經之注謂論作於後據此可知  
竊以陳氏獻疑固屬有見徐疏攷定不爲無徵鄭君始師京兆早  
通今學晚受東郡兼采古文是故鄭學宏通本先今而後古著書

次序實始緯而次經潛窺論言多據絃緯當在七緯注成之後三  
禮草創之時緯候所陳多與今文相合載稽歲月尤可徵明至於  
鄭君先爲記注後得毛詩此論並及箋毛當屬後來增益春秋孝  
經蓋亦猶是是則朱子定論不必晚年之書劭公解詁先傳文詠  
之例爰據各家輯本參以己意忘其僭妄爲之疏證伯喈之注典  
引庶能證其文辭子期之解蒙莊敢謂窮其旨趣所憾五三舊籍  
什一僅存讖緯焚餘叢殘摺撫末學疏失蔽惑繁多聊拾高密之  
隊遺俟達者之理董云爾

魯禮禘祫志疏證自序

周姬東亡禮樂壞缺政起破術鬱爲煙塵漢除挾書彬彬文學窺  
刊摺逸經始萌芽高堂所傳士禮十七天子諸侯是推是致禘祫  
鉅細年歲疏數淆於羣言莫衷壹是鄭君憫禮家之聚訟求古義

以折衷酌斟麟經之文裨補虎觀之議以爲周禮在魯著於太史之書魯王禮也昭茲明堂之位成王秬鬯之賜公旦黼黻之華義例可推梗概斯具迺自王肅發難掇逸禮之辭趙匡憑臆訾小戴之記謂禘非親廟斯審禘之義乖謂禘止始祖斯配天之制失末師昧古曲學吠聲橫暴先儒傳會無據不知隆周上儀當元聖而不具舍魯何適歎幽厲之已傷矧在煨燼之後掇拾之餘宛轉求通勢非獲已鄭君禘祫之志猶倉等推致之旨也曲臺傳記推士以及天子禮堂定制由侯以溯王朝且有賜祭明文廢譏特筆什一千百粗存端倪夏時坤乾差足比擬若夫禘大於祫祫卽是禘劉歆之所根據杜預之所引援斯皆左氏之文大異公羊之義古今各有家法師說豈必盡同且繹杜孔申左之言亦有常事不書之說是則僖文以下必非禘祫久疏卽以例推亦非強合若謂鄭

爲傳會豈嘗別有據依工訶古人求異而已敢竭愚鄙爲之疏證  
非謂能扶微學庶不沒其苦心爾

兩漢詠史詩自序

詩人思古乃有楚茨諸篇詞客詠史肇興三良之什爰自六代迄  
於三唐屬在大家之文率有懷古之作而濫觴伊始波瀾莫肆椎  
輪甫導金羈未施逮乎元明厥有專集鐵崖奇豔撫飛卿昌谷之  
遺西涯清矯開論宗文筆之體別其古近每輕李而軒楊推其正  
變毋是此而非彼矣僕本憾人少習史傳間有撰述託諸短章上  
自七雄下逮六代意興所及篇幅尙尠然成帙獨在兩漢誠以  
漢治近古史文尤工凡一盛而一衰皆可喜而可愕始則赤龍受  
命銅馬稱帝雲興芒碭雷震昆陽三傑翊運平鑿齒之磨牙四七  
授鉞埽鼉聲與紫色則有叔孫禮樂彊華符命挾書除律金絲之

響乍騰以識定禮玉牒之文斯鏤此一時也文景繼治庠序未遑  
建武中興枹鼓初息至於武宣之世明章之朝石渠署設攷金馬  
之文章臨雍禮成修袞龍之法服文治斯鑠武烈更宏金人列於  
甘泉玉門開夫亭障狼居勒銘遂致渭橋之謁龍沙坦步喜告蔥  
雪之平又一時也運罔隆而不陂火久揚而欲沈故自元皇臨朝  
和帝纂御雖恭儉之德有逾於前而魁柄之重漸移於下薰育擅  
國煬竈之禍深房閹持權牝晨之患亟朋黨交構易謬元黃戚宦  
互爭勢成水火乃致龍蛇襍處麟鳳不祥東海蕭生和鳩自殺閹  
西夫子大鳥陳寃又一時也由是哀平短祚桓靈不君董卓大賢  
欲法堯舜張趙常侍倚若父母門樞白髮傳行王母之籌石上黃  
梁錢數河間之女遂使玉璽墮地麋鹿寓城去丁傳而得黃龍始  
宮鄰而卒金虎九錫開國起新室之豺聲干乘北邙逐平津之螢

火又一時也嗟乎高光二聖幾閱櫛沐之勞莽操一出遂遷龜鼎  
之祚讀班范之史未免拊心問西東之都已成陳迹樂府協律空  
夢想夫昌時茂倩解題非必仿其體製聊爲長短之句藉作塊壘  
之澆濁酒三升但資嘯嘯廣武一歎誰是英雄效李嶠汾陰之行  
敢自矜爲才子比空同漢京之詠庶靡濫於風人爾

宙合堂談古自序

蓋自清濁剖判乃殊君民厯數肇興爰紀朝世陵谷歲異而乾坤  
莫更焉江河代遷而日月無易焉稽刑措於來葉或致一變之休  
遇純樸於荒村恍逢太古之俗何以鳳鳥不至空駭黃神之吟祖  
龍旣興遂爲赤帝之代元會遷貿朗耀代渝維抗心之所希豈目  
論之能及乎夫混沌本無竅也而鑿之則死駢枝非有用也而斲  
之則啼繁昔蜚麟蜚馬之時紀龍紀鳥之代豈不知顯庸可以開



樸陋文治可以飾隆平然而厯彌億年絢髮聞首之俗道穆十紀  
茹毛飲血之遺侯岡制書鬼爲夜哭化益作井天使龍騰蓋文愈  
盛者道愈衰能愈多者德愈薄圭玉方錫旄鉞遽乘書契旣開誓  
詰斯作來禩巨患皆往哲所深防末俗豔稱並前謨所不屑然則  
稽鏡萬葉憂勞一心強留榛狁之風藉緩紛擾之禍其慮可謂深  
矣其德可謂鉅矣且否泰大運也挽回大力也銅頭鐵額興暴皇  
年日烏風禽告灾帝世城搖伯鯨之尾山觸共工之頭古之人當  
陽九兆殃元二遭厄何嘗不殫慮以鍊石胼胝以灑沈是以鼇柱  
旣奠鴻荒乃安龍門肇闢鮮食方奏獨力不足任也則搜巖以佐  
之具文不足張也則藏密以孚之景命不常則郊壇以禮之靈繹  
將歇則螭虎以乘之試由登巢秣蠡之初遞及披山合符之代更  
由遊河巡洛之盛下推遷鼎俘玉之朝玉步屢改而河海仍晏徽

號一變而天地再清雖俗殊澆醇道質爭讓至於通變神化其揆一也是故慄慄黔首非天莫生茫茫赤縣匪聖弗濟惟天生聖故逮元黃戰野之難必有人以匡其危惟聖承天故當蒼赤舛度之年尤竭力以挽其運自子開卯闢以觀其會則勳華實際乎中天自羲畫農耕而集其成則成康實膺夫極盛日中則昃盛過則衰聖人知其然也故畫野建國金科玉條賓興農軍隆規茂矩所以防林生之畔換制猾夏之橫行三五代興軌迹無易不幸道數殫極閭忽不還變兆春秋道傷幽厲蒼天何醉反以賜秦元聖降靈僅能綴學亞斯之代氛霧日封蓋王霸之莫逢更隆古之奚望乎嗚乎開物成務古之人力勑於睢盱之初變俗敗常後之人汎埽於塹隲之會卒至金虎亂噬羣龍力爭生民之禍亟焉文武之道盡矣此尙論之士所爲傷心者歟士生晚近稽覽前徽帝典王綱

日以弛廢巢風羲埃時惟寂寥我適安歸黃農之忽焉已久無爲  
至治華胥之夢想徒勞爰鏡至精扇遺烈窺刊石摺逸文折羣言  
之淆亂條近事之苛煩或陳古以切今匪貴遠而賤近庶幾魚藻  
古義聊以諷時燕說郢書亦足治國云爾

鄉詩撫譚序

緊昔選樓巨製昭明導其椎輪玉臺新詠孝穆揚其麗藻甄錄之  
事大啟評騭之風遂扇鍾磬品目仿九等之人表張爲鑒裁圖一  
堂之主客茲宋以降詩話尤夥若溪漁隱倚撫詳於汴京詩人玉  
屑衡量逮乎南渡滄浪神悟別開禪宗浩然雅譚超出恆解咳唾  
所落圭臬斯奉蓋中郎枕祕非直藉爲談助釋氏燈傳亦實導夫  
津梁矣然而摯虞流別徒標宗旨鍾儀楚奏不盡土風別戶分門  
或近標榜之習維桑與梓無與敬恭之義亦有吳都文粹響振南

音山左詩鈔風表東海攜李詩繫松風餘韻皆摘鄉賢之名筆甄  
先哲之雅音考獻徵文欣開卷而有得裁章鏤句覺古道之照顏  
非見少於一隅實寄通於千載懷舊蓄念尤深遠焉新城楊鐵佛  
先生少負奇稟長多咫聞鸞翮未翔蛾賊旋逼黃巾滿地不拜鄭  
君白羽一麾誰爲葛相嵇秀才從軍莫效杜工部避亂無歸欲登  
樓以銷憂益增慘惻將強人而說鬼復戒妄言於是招客縱談論  
詩破寂首及宗派意在更張夫東萊作圖溯淵源於雙井西江衍  
緒傳衣鉢於三宗一時播爲美談百代奉作科律而兒孫學語強  
媚初祖刀圭醫俗或誤後賢先生尊靖節爲不祧列歐虞於別子  
羽翼附見仿廷禮品彙之規軼事嘉言擴遺山中州之例權衡悉  
當識解彌宏至其遠推二劉近舉三魏皆獨斷於胸臆不隨人之  
步趨蝴蝶鷗鷗斥流俗之傳會鯨魚翡翠浣花之鑒賞所謂別

裁僞體轉益多師者歟若夫專舉一鄉毋滋他族大江之波瀾莫  
二雄州之俊彩交馳攬廬山之黛光秀出南斗騰豐城之寶氣上  
燭中霄良以白日放歌無復還鄉之夢青編采輯藉寓首邱之思  
其彊記之功等諸安世三篋箸錄之瘁過於子雲懷鉛矣少微久  
沈手民未付晏楹之書莫保藝林之播無時寄廬主人恐夫葫蘆  
漢書難留真本羽陵蠹簡易化煨塵乃正其舛譌登諸剞劂錫瑞  
獲與挾讐之役敢爲隍引之詞庶使河嶽英靈世服殷璠之鑒中  
興間氣人推仲武之評云爾

古泉襍咏序

緊昔太公九府爲圖法之權輿周禮六官有邦布之職掌禹湯鑄  
幣筦子未著其文夏殷靡詳班書或疑其說是則員方取象肇創  
於釐姬子母相權下開夫赤制龜貝之運旣謝鵝莢之制遂孳銖

兩區分形式代變李唐舊事封演之書不傳趙宋多才洪遵之志  
方輯亞斯以降箸錄尤夥缺而未備迨探驪珠擇焉不精混貫魚  
目重性馳繆覽者病之葉君煥彬斟斟三倉挺捫百氏五鹿折角  
驚其談鋒千雞富蹠飫此腹笥撰爲古泉之咏取證吉金之名載  
籍極博上揜顧金折衷至精近攬戴鮑爰推其例厥有數善太昊  
九棘神農一金通志臚其異名董譜逞其臆說神奇入品類鳴化  
之荒唐皇古紀年笑鴻荒之疏遠不識安字猥云軒轅但睹陽文  
卽曰顓頊君斷自周代參以鄒書安邑地名非必禹都所船乘馬  
齊幣定由虞國相傳垣字別體巨倡全非寶篆異文朋益皆誤導  
滯釋疑可以觀古貨泉流傳國運攸繫有以徵物力之豐耗驗制  
作之楷良或鎔鑄精工或攬和窳蒨盛衰若鏡模範斯存君兼資  
三長仰睇千禩開通開元辨之歐體雙節雙劍正彼齊書直百加

爲悟貨贖之通借吳興著沈定治鑄之官私宇文襲西周之稱拓  
拔沿北俗之舊會昌以紀年號知譜錄之非誣元豐豈有錢荒見  
史志之失實大定之合聖宋中原已兆平分崇禎之繼大明元號  
無端割裂窺刊摭逸可以證史自來文人強作解事鄉壁虛造託  
素王之書奇觚妄會摹蒼帝之篆方足難識疑爲世外桃源刀環  
連文認作秦時明月君推求義例諦審偏旁刊賈疏之野文定鄭  
注之增義晉陽蕩陰蒲子女水間邦寶造乘邑非梁作與詛同戈  
從劇減二金當爲寶化五行宜辨刀銘靡不爭點畫於毫芒通形  
聲於訓故至於右爲袁半圓卽袁增杏九齊刀正沂州之誤字黃  
千莽布拾新室之遺文尤能定眾說之糾紛挾六書之奧祕鑒微  
識眇可以定譌米鹽凌襍小道可觀叢殘搜掇大雅不廢迺或俗  
情染墨過信齊器之犧浮說雌黃致疑魯鼎之廣君鴻才英妙夜

識金銀鱗香壤奇源分涇渭別蟻鼻藕心之非幣梳磬更屬虛誣  
蚩辟兵利市之無靈符錄誰云劾制入仙高會曹舅原是少年五  
毒祛邪天師特顯靈蹟龍皆四足孔僖之傳堪尋背有三釘憲宗  
之紀斯合周元祕戲頭倒鴛鴦正德催生描摹龍鳳謂刀幣皆瘞  
錢之屬目印紐爲私綱之遺足見鐵耕癖談猶爲得半晏海金索  
總屬習非殫見洽聞可以博物夫攷據顓學或儉收藏賞鑒名家  
每疏罕究求其通經史之古義正金石之遺聞掃葉無譌積薪居  
上超超元箸歎觀止矣旣付荆氏屬爲弁言錫瑞翠柏供餐阮囊  
羞澀青鏤入夢江筆荒蕪今披爾首之詩恍入五都之市阿堵不  
識數契齒而笑愚奇寶莫名向佛頭而著襪嗟乎人頭騎馬爭傳  
烏弋之形模白腹黃牛未睹赤符之興復海舶外溢關市不譏銅  
山西傾漏卮誰塞諷君斯集尤不禁感慨係之已



清嘯閣詩草序

夫任運之道有常而發言之途不一春麗之製以入山林則俗韻寥之音以登廊廟則野是以紉縵炫爛八伯歌風井田樸純老人擊壤閭宮有恤公子攄頌魯之辭王室夢爭退傅挺在鄒之作亞斯以降各騁厥秘金采鏤錯光祿獨嫻於廟堂風月畱連陶令專宗夫隱逸或瓊璋以振采或沖溶以葆真繫昔詞人尠能兼善芝岑夫子牛斗紫氣豫章朱門擅大夫之九能通齊學之五際西江宗派咀含黃陳大家體裁追逐李杜參其正變靡濫風人覈其遭逢足稱年譜當夫曳長裾游太學逸轡初騁雄筆始奮擬謝湖口金膏染毫摹鮑廬山黛色落紙馬當風利子安序閣之才牛渚月明彥伯相船之詠川原鬱其今感風雨觸其古悲俯唱扣舷則潛蚪夜聽高吟題壁則征馬晨瘖此一境也已而秋部分曹樞廷傑

直橋通玉竦障對金雞清露點衣衛國夸遇御香惹袖嘉州紀榮  
則有燕市酒徒鳳城詞客述歡梓澤送別河梁江亭晚涼賞秋關  
韻玉河冰凍銷寒聯吟此又一境也山水模範元嘉勦其規時事  
閱傷建安肇其體少游覽則見狹無感慨則響浮師北轍南轅高  
掌遠瞻淳吳越之露楫裊荆豫之風駟橫流滄海颺驚心緬邈  
山河煙霜楚囑秦川登瀛之作標名七哀平原入洛之詞騰譽二  
妙此又一境也福星照世屏風記名竊幸三湘之間得逢萬家之  
佛本來仙吏居近瀛洲矧有宜園足供吟賞每值訟庭花落燕腹  
香凝政事閒而毫翰揮賓僚集而酬唱洽飛來墨雨總繫蒼生寫  
入華箋益彰清節文翁石室多儲西蜀之英庾亮胡牀不廢南樓  
之嘯此又一境也鶴書天上驪唱湘湄借寇有心畱鄧無術賈傅  
宅古慨宣室之空徵定王臺高望長安而不見師逸興颺發委心

去畱澹疏傳之宦情求向子之夙好眺祝融之日霄漢心懸閭衡  
嶽之雲精誠天鑒此又一境也由是休神家術息景故園弔琵琶  
於江頭撫香爐於塵外北隴猿鶴無怨蕙帳之空東山絲竹還尋  
棋墅之樂煙墨時染霞想益崇雖閣外江湖不忘魏闕而壺中日  
月何異仙家九老圖成同人韻疊地非蓮社觴詠並宜人似香山  
鬚眉皆古碧筍黃菊多賞心之辰瑤草紫芝有遺世之概此又一  
境也自己酉至戊子都爲清嘯閣詩草十六卷嶽游草一卷蘇門  
長嘯脩然鸞鳳之吟子野清歌輒有奈何之喚半生吏隱常適其  
天倪中三哀樂不煩於陶寫自非靈響遠結淵懷獨澄烏能追正  
始之音備眾家之體乎錫瑞湘中校士著籍最先海上尋師刺船  
已晚談經馬帳詎忘飲水之思問價雞林幸覩藏山之業拜觀宏  
集謹綴小言念廿載之從游當執挺作門生之長承九天之咳唾

敢升堂窺夫子之牆聊效引喙莫窮鑽仰彥升序文憲之集藉以  
酬知記室品陳思之詩難爲贊美云爾

讀選樓詩集序

武進張皋文宛鄰兩先生古詩詞選比興深至上薄風騷芳馨遠  
流下逮閨閣澗香女史宛鄰先生外女孫也蚤承舅氏之教能傳  
外家之學何無忌之酷似仿佛渭陽謝道韞之聯吟咨嗟太傅幼  
諷詩選雅工摹畫擬古雜體豈讓江花憶弟真情將同謝草絕無  
脂粉之習奄有漢唐之音惟是其才則豐其遇甚嗇歌成黃鵠悲  
鳴無依却換紅羊橫流何酷蒙楚摧其肝鬲颺唳賦其魂神塗碧  
毀容赴丹明節尊章在上期同穴而未能荆棘塞途攀靈輅而莫  
及攜持孤弱轉徙烽煙惻惻嫠嫠荒荒天地感歸葬呈舅姑諸作  
令人不忍卒讀是則哀如徐淑更益摧傷憤比文姬絕無瑕玷者

已或疑鏗鏘發韻非巾幗所宜揜抑含情何簡編足述不知六義  
正響無廢婦人三家遺文多存故訓有如蔡歌芼苢申感行露汝  
墳勸勉柏舟憂思燕燕送歸之清式微貞一之節泉水之懷姑姊  
載馳之念國家皆見取於聖門何獨苛於繡閣至於造物所忌每  
在才名詩人多窮匪殊男女試觀風詩所列卽多哀怨之詞逮及  
團扇秋悲琵琶遠嫁盤中四角機上回文靡不義心苦調悵悵切  
情蘭芳發於委灰玉聲振於碎壁故知文章憎命非獨刻於鬚眉  
女子善懷詎不光於篇翰乎女史以青裙嫠婦作絳帳女師古井  
不波悲谷易謝師資旣喪痛等絕絃遺集堪傷語同自道副墨畱  
於河帥槩本出自湘英從茲傳播人間亦足慰情地下錫瑞茗柯  
之學素所服膺讀選之詩幸得寓目披雲霞之新製仰冰雪之清  
操才愧徐陵敢作玉臺之序意同劉向冀傳列女之詩云爾

駁五經異義疏證自序

漢代縣邈家法淪胥許鄭二君規模粗具南閣祭酒植訓故之宗北海司農綜章句之匯人竭鑽仰戶盡尸祝擬羲娥之並曜似泰華之爭高矣漢學有博士所職有壁經所傳或紹顓門或名通學許鄭文雖崇古學實兼通許君之敘說文自云皆古而詩徵韓魯匪獨毛公傳列春秋不專左氏說文意在博采異義何獨不然鄭君注禮箋詩先今後古其爲通學無待名言陳恭甫云祭酒受業侍中多從古說司農網羅囊括兼主今文此據大概而言非與全書盡合今觀異義親屬有服用歐陽之書鄭詩淫聲取今論之說天子駕數不信毛詩鸛鵒來巢迺從二傳足見許案該洽略似說文鄭駁宏通亦同箋注不得拘古今之殊旨強許鄭以分門矣陳氏疏證義據通深金壇詫爲異書學海刊入經解承學之士研尋

靡旣攷其得失可略言焉典禮閎達名物章明鉅自郊社禘祫細至鬯醴鑣鞞開發蘊奧甄經史之精英剖析毫釐釋疏家之疑滯導先河於千載洵闔室之一鑑乎惟是徵文貴博胡瑱不顧數典必詳雖纖毋缺而陳氏於朝覲盟詛請謚感生除服成昏夫人會葬二王三恪之異駕六駕四之殊公侯祭辟爲報大功枕席相連宜推昏禮皆直錄文句不加證明有似未成之書曾無一語之綴是謂漏略其失一也祠共之禮專言五兵復讎之義未及百世獲麟受命弗詳土木之精大夫無刑止通劇渥之解九族略舉今說失取證於古文五行惟列歐陽昧探原於伏傳左驗雖具肯綮未嘗譬之腹背有毛無補黃鵠之翮爪鱗空索莫探驪龍之珠是謂闕疏其失二也譏二名之旨反駁公羊當爲爨之文誤訾鄭注大

夫無主古義所同迺承晉魏虛造之詞詆許鄭通儒之論是末師

而非往古賤玉貴珉怵俗見而背舊聞毀鍾鳴釜是謂習非其失  
三也明堂一條言逾二萬徒眩元黃於五色未別黑白於一尊六  
宗稱禋七廟不毀多牽引而失斷每汎濫而離宗繁華損枝隱蹈  
彥和之戒買菜求益將爲子陵所呵是謂炫博其失四也錫瑞少  
而習業素所服膺恥杳冥而莫知期推廣其未備受春秋之讀敢  
贊一辭仿毛詩之箋別下己意據袁氏之輯本述陳案之原文補  
其闕遺剔其蕪濫竊意漢儒舊義今文師說尤衰願盡扶微廣異  
之心弗沿黨同妒真之習自抒心得詎惜般青之勞翹異前人敢  
矜出藍之美吾才既竭不知所裁冀承校長五經之傳聊備禮堂  
一家之學爾

榆霞山館師友詩錄序

昔者淵路二子始著贈言之風蘇李五言肇興錄別之作沿及昭



明選詩創分贈答一類曹劉潘陸振玉響於前顏謝沈范施金羈  
於後元結傷往乃有篋中之編張爲賞音斯圖主客之句西崑酬  
倡汴宋聯鑣中州總集金源逸軌邈則虞山吾炙迦陵篋衍皆徵  
應求之廣非侈標榜之盛夫年歲有盡難沒者性情陵谷易遷不  
朽者文字是故和呂者律興雲者龍餅罄聶恥乏焚蕙歎月魄上  
蝕則珠胎下虧銅山西摧則洛鐘東應然則篇章投贈悉精氣之  
所存師友淵源託翰墨而長在固宜置書懷袖字三歲而不滅豈  
曰摧燒拉雜心一寸而可灰乎鮑蓉泉師瑤鏡在胸丹篆入咽學  
識攀夫賈董文采麗於淵雲騷客遺聲潏沚芷澧蘭之秀參軍世  
學兼倣詭靡曼之長固宜入參文昌出荊符守轡龍章於丹地鏤  
鴻烈於青珉而乃蚤擅詞場久阨秋賦晚膺鄉薦復困春官劍韞  
豐城尙揜雙龍之氣翼戢溟海未覩大鵬之騫迺以當代之文宗

老作諸侯之賓客謝安石青山長往未忘蒼生庾杲之紅蓮是依  
將泛綠水於是子荆入幕仲宣從軍參上將之韜鈴騁書生之筆  
舌南海蠻徼旣發弩牙之機東溟鴨江復磨盾鼻之墨斯時也黃  
龍清酒舊盟已渝元菟孤城他族逼處招荆楚之劍客出山海之  
雄關匹馬短衣將隨李廣飛書草檄競用枚舉無如兵氣不揚良  
圖莫騁雖定遠天幸生入玉門而灌夫重傷致受金刃其遇可謂  
艱矣其阨可謂至矣而師忘懷得失追憶平生當閉戶之餘閒理  
藏山之故業念自束髮受書之始逮茲顛毛垂白之年高軒賦詩  
早驚長老南閣解字博訪通人縞紵遍於東南箋縉盈於几案凡  
在雲霞之契莫非文字之緣又自橐筆遠游從戎負羽鯉魚遺我  
中有素書羔雁成羣時來聘幣張憑勃率爭問孝廉之船任昉縱  
橫惆悵騎兵之戲乃睠其氣誼皆屬神交觀其姓名半登鬼錄問

當年之白社無復周雷思少日之黃壚徒傷稽阮儻復羽陵朽蠹  
竹葉叢殘能無動覆瓿之嗟深蠟車之惜哉於是悉心詮次用意  
校讎錄應劉之遺文都爲一集感文憲之知己重比千金師擊唾  
暮年常懷壯志看花觀裏有慕詩豪取劉夢得莫道桑榆晚餘霞  
尙滿天之句以顏其齋卽名是編爲榆霞詩錄將付剡氏命序簡  
端錫瑞髻齏從游比元亨之問字丹鉛親侍觀記室之品詩但以  
附見爲榮敢居審音之列謹述顛末愧乏東海作序之才將求多  
聞如讀漁洋感舊之集

師伏堂聯文卷二目錄

俞廩軒中丞臥遊圖序

春秋列國名臣序贊

漢雲臺中興諸將序贊

唐十八學士序贊

嶽麓書院六君子序贊

雙清圖贊并序

徵刻朱文端公藏書十三種啟

重修屈賈合祠啟

滬上寄都中友人書

與李荔蓀書

與王懷欽書

目錄

出都與程伯翰書

宣平與黃鈞甫書

師伏堂駢文卷二

俞廣軒中丞臥遊圖序

夫立身之道有常而馳想之途不一何則身繫安危者處身不能  
遺累想通寥廓者緣想可以造形畫龍非真而不妨視以爲真圖  
象本幻而不必名之爲幻少陵題鄭公繪事擬以太傅邱壑東坡  
詠晉卿曼嶂憶及故人山中誠以心迹兩忘始能攄蟬蛻之致意  
匠所構庶少慰鴻鸞之思也廣軒中丞東浙德星南湘福曜早結  
雲霞之契夙懷經緯之才敷歷四方鴻勛勒於鐘鼎謳吟萬姓駿  
惠溥於封圻而公勝概遙情高掌遠蹠因寄所託情澹朱門自全  
其天意輕丹轂回憶家山之樂有懷泉石之清柄任旣隆求歸未  
得於是解衣盤礴覓宋君之畫師元氣淋漓畱王宰之真蹟晨煙  
暮靄妙染夫丹青黛色金光象呈夫絹素圖成卷軸名以臥遊親

撰詩詞廣徵題詠今夫進退者運也卷舒者神也世有情兼吏隱  
道裕龍蛇裴相午橋勝窮綠野白傅高會老樂香山志和浮家放  
浪菖雪之際義之誓墓徜徉吳越之間既早遂其榮名復晚全其  
高致亦有才爲世用事與願違眷顧深而不獲抽簪功名盛而無  
由解組畱侯謝病難尋赤松貢公遺榮未脫朱紱平泉作記惴惴  
夫名園思潁成詩流連夫勝境此其人皆契通竹柏志在林泉而  
南陽臥龍之廬空縈寤寐東山自蠟之屐莫遂登臨能無思餌金  
精而冀耽石隱乎且公之珂里天下之名勝也山陰道上應接不  
遑浣紗溪邊釣遊皆適獅嶺駝峯之路籠鵝射鴨之場皆昔人所  
豔稱過客所欣羨矧乎枌榆之社朋舊招邀桑梓之邦兒童嬉戲  
浮屠之宿樹下不無戀情遊子之悲故鄉尤勞魂夢然則公之摹  
繪水石驅染煙雲雖懷栗里之高亦重稽山之景豈若多金季子

夸親戚以尊崇衣繡買臣詫鄉里以富貴平公之以臥遊名圖也  
謂與少文同調少文好遊五嶽老不能行爰圖四壁以供循覽滄  
洲赤縣徒馳汗漫之觀異地青山何與鄉關之興公則寄懷越水  
歇夢錢塘柑酒鵬聲未忘春景蕪尊鱸膾每觸秋風拂衣之念猶  
虛隱几之憑亦樂此則蘇門長嘯如聽鳳鸞之鳴蕙帳俄空恐遺  
猿鶴之怨者也惟公位望方重神明未衰自陳臬於三湘暨開府  
之五載長沙貧國不取煩苛伏莽危機無驚聲色在南國之懷召  
伯如潁川之借寇君雖徑菊庭松久企旌節之返而衢歌巷祝深  
恐衮衣之歸欲白雲以自怡舍蒼生其安往所望衣披一品骨抱  
九仙逮登眉壽百年再賜鑑湖一曲則耆英會上同尊洛社鬚眉  
晝錦堂中益重魏公勳德公之翫斯圖也正可望梅止渴緩歸歎  
之懷何必叢桂畱人歌招隱之句哉錫瑞隨侍先嚴質居古越娥



江剡水打槳乘潮禹廟蘭亭畱題疥壁凡我公發祥之所皆賤子  
遊歷之方而過眼如煙墜歡若夢青鞋布襪難追霞客之蹤白嶽  
黃山未遂向平之願歎鷗盟之久負鳬鴻爪以何時今展公圖誦  
公詩詞更不禁令人神往矣

春秋列國名臣序贊

夫雕虎嘯而清風起應龍翔而元雲升伊昔聖哲之君必有名世  
之臣醍鬯元化扶植人極匪賢弗毗靡才弗贊金提烏明琢磨皇  
風鼎飾鷹揚光輔盛治元會日降際遇實艱彼蒼生才鮮熙天耀  
日之能惟士遇主歎旋乾斡坤之力慨彼偉略屈而小試或才足  
相萬乘而躑躅於蕞爾或德可冠百僚而摧抑乎下位扼腕蒿目  
嗟我生之不辰歎鳳傷麟撫昌運而已往然猶奮其智力就其績  
效上敦在三之節下謳畫一之法雖微瑱之愛僅流一方而紀常

之烈亦燿已。應斯亦濟時之舟楫。幹國之榱桷矣。有周東遷大運中。圯巖涓絕明王之夢。尹武叢世卿之譏。選舉久廢。漸遠之鴻鸞。乏采疆宇。日蹙勾水之鱣鯨。莫容是故。代易十四歲。逾二百而王室諸臣罕可稱述。列國髦傑莫登天朝。至於魯國一人。僅聞禮器之觀。農山諸賢空淹下國之迹。卒至問鼎覬位。竊鉄被言。乃知濟濟多士。西岐所以維新。無陪無卿。東洛所由守府。得失之效。不其偉歟。夫璞玉輝山。不登明堂之用。寶珠照乘。匪特一國之光。周棄其人才。效用侯國。乃使魁能之士。雄俊之姿。韜彼鳳采。上不得揚于王廷。困夫虎苛。下不盡用於邦。邑歌碩鼠者。或扣牛角。厄養牲者。乃鬻殺皮。皆能據其璋材。鬱爲時棟。或襄匡合之烈。或著強霸之效。蝸戰之國。憑策力以殊廢興。鵠舉之徒。覽德輝以決進退。楚材晉用。開市駿之風存。魯亂齊敗。雕龍之辨七雄。盛其軌而列國。

肇其端斯亦士貴於王而賢益於國乎且經綸者才也際會者運也有才無運潛龍不能階尺木有運無才蒙虎無以威百獸春秋諸臣稱國器則不愧躋王佐則未能以彼錚錚終異蹇蹇器小非儉乃在天下之才作法於貪且詆眾人之母彼二子者皆明足以炤幽覽略足以繫絕維然而首變舊章兆開乎名法漸趨簡易禍極於鞅斯效雖收於眉睫弊乃見於身後逮此以降一節乃優求其能潤色王業經緯大猷者固無人焉然猶賴其匡末俗制頽波彌闕遺振衰弊使夫豐鎬餘澤得延於獲麟之前桓文盛烈不遽致金虎之變挽日下之勢竭其股肱亨雲雷之屯殫厥勇智軌轍既易霸圖肇興陞統如綫臣力益振以至納肝效忠化碧無悔白日將墜泣揮魯陽之戈震霆勿驚憤挺攸飛之劍挂瓢之風不墜於輓近采藥之義足化乎澆俗原其器幹與彼志節雖道未方古

猶遠邁漢唐矣蓋自隆周以來鳳皇翔岡振鷺充庭免冒顯彼閭  
天魚鹽舉夫膠鬲世選爾勞休戚與共野處不匿秀髦咸烝爲周  
之楨並升夫殷士於斯爲盛上婉夫唐虞遺烈未湮故家尙在雖  
或遁於空谷亦散見於四方魚躍于淵文武能植其材飛鴻滿野  
春秋猶收其效是知種桃李者蔭及數世蔚杞梓者材貽四鄰此  
所以道息愈光且決而未潰也季友以兩社之忠開三家之始聲  
烈雖茂裔嗣弗紹柳下三黜臧孫爲政雖不朽之譽取高世祿而  
蔽賢之責難逭鉄鉞矣晉之卞伯狐先實爲上勲逮其中衰羊舌  
弗獲大用石甯兩臣忠能定亂史遷不進僅可救亡故君子之多  
雖足重國而大臣之道首在薦賢鄭有罕虎齊有叔牙維彼二賢  
見識知已晏客石父乃失宣尼然墨者之言頗疑失實令尹三仕  
鬬孫並稱楚材雖多先後並美入郢之難包胥乞援於外沈尹抗

節於內人好司馬并及葉公雖彼象賢亦推烏愛也夫恢瑰之才必垂景鐘之銘正素之士不惜崑玉之碎當時九州相君上士達節然如荀息孔父仇牧之殉國召忽彭生之授命士燮叔孫姑之効死子家羈之從亡在彼當日固屬歲寒之松傳之後世亦云風勁之草若目夷季札遜國稱賢近比曹臧遠追魯隱亦詎不可愧彼攘臂消其競心者乎語曰得人者昌失人者亡虞不用百里奚而亡秦穆公用之而霸闔閭用伍員而霸夫差殺之而亡是故良驥常有罕逢伯樂之識威鳳高翔必俟夔律之應乃自猜薄愈甚大義罔終范蠡浮於五湖文種墜乎一劍功同再造而身莫保元吉桓文之風莫嗣管狐之勛不錄此世變日下而春秋之所以終也夫盛德弗泯光炤旂常先芬未寂文煒編簡贊美之義振古爲昭大漢龍興士衡振其瑋詞三國虎據彥伯奮其鴻筆矧夫才爲

三代以上功著五伯之間論定聖門榮喪華袞豈可使縣世寢遠  
頌美弗傳朗耀漸淪光靈不屬者哉乃次其名臣各爲之贊魯八  
人季友曹翽展獲臧孫辰仲孫蔑叔仲彭生叔孫婁子家驪晉七  
人荀息狐偃趙衰先軫士會士燮羊舌肸祁奚衛四人石碏甯俞  
史鰌蘧瑗鄭四人考叔國僑罕虎游吉齊四人鮑叔牙召忽管夷  
吾晏嬰楚五人闔閭於菟孫叔敖申包胥沈尹戌沈諸梁宋四人  
孔父仇牧目夷樂喜秦二人百里奚蹇叔吳二人季札伍員越二  
人文種范蠡贊曰

赤雀沈輝火鳥墜彩皇輿雖遷玉步未改瓜剖分疆塵飛動海頌  
歌菁莪香鬱蘭茝道廢王朝光啟侯國列宿儲精羣英奉職各附  
驥尾爭攀鳳翼珠光競明玉采無匿宗邦秉禮寶祚中頽黨臺割  
臂桓宮忘哀偉彼成季支斯傾危在手有文賜田爰開破斧滅親

寶刀殲魁三桓位冠兩社功推桓桓曹劌勇奮風雷匕首旣動邊  
關以恢圖鐘諫社文武兼才鄙彼肉食無謀可哈枳棘栖鳳疑爲  
不祥鴟鴞雖紛苞采彌光柳下三黜直道自昂袒裼非挽坐懷若  
忘片言鼎重三篋書藏聖師百世身摧道彰臧文擅名庸中佼佼  
世傳諫節言重坊表邕圭齊羅玉穀衛保藻山巢驅鐘鼓樂鳥旣  
沒不朽蔽賢非道瑕不掩瑜亦云國寶醴泉芝草羌無根源煌煌  
駢角見重山川加人一等獻子稱賢聚斂不畜美室匪愆惠伯殉  
王大節懔然身埋馬矢名失麟編玉霜封條塞松乃現鶚之兆禍  
鷄門興變懿伯從亡堅逾百鍊苦志執綬忠言規瑱復君未克從  
政奚羨雙琥旣辭神龍不見叔孫多賢先穆後昭豹乃晚謬婚不  
私勞爭幣魯社請冠霸朝見旌遺憾言囈徒囂一死自白三命奚  
高魂魄去矣誰歌大招蘭以焚香玉以剖潔君命雖亂臣心乃烈

荀叔謀臣亦仗名節甫操寶璧旋傷金珙九原弗慚六尺可擊青  
簡有煒白圭無缺廣夏肇闢匪材弗勝雄圖鼎新匪人曷興狐趙  
佐霸冠倫魁能壺殄早潔投壁晚矜鳩飛享從鵠尾機乘一龍旣  
奮五蛇同升三軍洸洸元帥難得卻殺敦詩先軫尙德分田善謀  
公族橫擊蒙虎鏤勳匹馬龍敵怒唾于朝歸元于狄文襄繼興父  
子著績天下之寶不惟一方棄才於敵借兵賁糧秦用士會晉人  
傍徨鞭策旣贈敵寇乃光赤狄種滅絳林盜藏擊杖訓子殺丞尊  
王文子先見厚墉是防勝敵而懼速死乃祥奇才輪囷徒爲枿榱  
叔向之賢厄於位卑射鵠悟主瘠牛伸威貽書規僑徹備倣圍春  
秋是習學識振奇嗟彼羊舌喪於豺兒祁奚乘駟親仇不遺赤族  
之禍白首同歸復仇定國是謂純臣臣年雖老臣力方新燕飛送  
歸羊肩滅親寵祿弗過大義曷伸舒策貴智抱忠貴愚長胖守國



獸犬前驅薄醢不死藥醢潛輸歌詩論祀詎曰真迂猛獸據山藜  
藿不采賢臣在朝國命無改選賢屢出史直近殆過闕有聲如矢  
弗悔尸諫斯憤竈煬安在惜哉卷懷未作名宰寤生君國大倫滅  
天不愧白日乃誓黃泉考叔純孝母子復全舍肉悟主挾軻競前  
蜚弧先登射矢下顛猘犬曷詛姦人斯憐春秋多才誰爲領袖賢  
哉東里興自華胄攻盜振奇成童挺秀旣聽虎帥不卹龍鬥孰殺  
始謗兒啼終奏黃熊是辨鋌鹿毋走瓘尊匪吝玉環弗授乘輿濟  
人登陴備寇豈惟火烈治乃近王行無越畔校不毀鄉製錦勿使  
褚衣有章聖門稱道霸國歛鉅亦有知己罕氏推長戶鍾得民國  
棟稱良嗣者世叔萑苻是攘黃父論禮大言煌煌槃槃大才歎深  
微管霸圖肇興舊法克繼君忘射鉤臣侈鏤盤鄒黍阻禪包茅柔  
悍禮厚縶垂汲苦綆短社鼠深患鹽蜃謹算九合功鉅七子亂綏

惟鮑知管猶虎授僑分金賈市奉杯齊朝召忽彊武萬乘弗怵一  
葉生輕千仞節標受賜雖永勁風獨高三人鼎足生死同昭權寵  
方爭避難在儉平仲卑卑有幅自貶鹿裘以朝豚肩不掩貴踊溥  
利枕股非玷虎門端委牛山笑詔縹緲求賢書社詎險大臣之義  
主亡與亡牧也殉閔父亦屬殤禍起督萬亂生子商正色豎義手  
劍叱強攻家墮族著門逢殃華袞特筆並美公羊五伯迭興茲父  
最下楚毛讓泓鄩血丹社卓彼子魚職兼司馬遜國守國神靈攸  
假與宋升降邑中之黔公粟善貸火政莫侵枯弓轡逐削邑戍箴  
不貪爲寶千秋德音維楚有材雲蒸杞梓於菟毀家亦云忠矣朝  
設脯糗位澹惺喜嗟爾虎乳恐餒狼子孫叔良相薦由虞邱埋蛇  
陰德秉羽深謀城平板幹水灌雩婁高榭俗變北轅功收始進掩  
口末封搖頭廉吏可爲負薪終酬君親大倫惟義所處子胥包胥

復楚興楚臣懷存荆君慟越莽禍延蛇豕援乞蒲虎雞次賞逃鵠  
倚功舉司馬受命句卑布裳毀舟失策城郢知亡萬民之望篤生  
諸梁如父如歲云掩云傷定亂避位方城之良好驚眞龍直舉攘  
羊穀陵之敗蹇叔哭師棄彼黃髮乃遇墨衰百里舉媵上侔莘伊  
龍尾虞滅牛口秦知慷慨養牲悲歌伏雌有子不懈顯君西陲乾  
坤生才不遺山澤於惟大賢德變蠻貊延陵翩翩名節赫赫審音  
知政與縞贈客劍挂且許鉞交何責大雅不羣追蹤泰伯復仇大  
義著在春秋吹簫吳市解劍漁舟臣報棄疾君忘姑浮南郢鞭尸  
東門懸頭江濤馬奔宮露衣摳屬鏤旣賜主恩以酬前沈後揚皇  
天之祐羽翼旣成山河重秀赳赳子禽稽山居守九術敵破四封  
國富夷光亂謀寶器致賂烏喙共患狗烹曷救朱鳳銜圖乃不再  
鳴翠虬潤物復歸滄瀛淵哉少伯犬竇發聲窮天格高極幽洞冥

五行消息萬物化生小試霸越三徙成名鑄金環封懷寶間行逸  
氣超世千載誰爭世亂多才綱頽復振人競翔翬國思市駿象賢  
舊族烏巢新進金版銘勳珠槃弭讐英英羣彥濟彼時艱素王曾  
褒青史弗刪偉烈範俗古光照顏式此型鏡貞爾河山

漢雲臺中興諸將序贊

君臣之際難言之矣冠履高下纁堅之位既定股肱左右毗贊之  
績遂著上塲下驥必將有以扶其傾綱頽維絕必將有以繫其紐  
苟非魁傑曷佐哉定圖緯之符旣陳景風之典斯舉是以豺螭武  
成乃崇茅土虎豹戎服亦賞金石開國寶玉義著乎獎貢中興圭  
瓚光昭乎虎拜所以崇報功德褒酬庸勳三五迭隆靡不由此道  
極數殫斯義堙瞶馭下者不以坦懷待物而切雷乘之震奉上者  
或以高勳自詡而忘日贊之美凶隙斯構上下交失五戰入郢卒

斃鴟夷九術沼吳終厄鳥喙龍顏御世牝媮尤酷信越菹醢不勝  
冤憤布綰激變亦昧保全帶礪誓在皆成虛文旂常功高反爲大  
戮以陰以雨常懼安樂之棄有初鮮終徒傷患難之共鳥盡弓藏  
兔死狗烹秬鬯彤盧何其闊哉若漢雲臺中興諸將者可謂懋功  
懋賞善始善終者矣世祖迹奮白水珍握赤符霆擊昆陽則鴻烈  
慕聲電埽邯鄲則駿民効足具祖墳之大度推置腹之赤心帝王  
有眞鄙井蛙之握嚙從容笑語懲黃龍之猜刻遂乃驅駕眾力鞭  
笞羣雄鉞授四七胤龜百六東洛帝鄉富貴與共南陽故人優閒  
自保其時豈無高密侯之敗績咸陽王之飛章寇君甚得人心吳  
公隱若敵國然而雨雪之疑見睨卽消白日之明浮雲莫蔽至於  
起兵主簿儼同父子之情璽書司徒不諱堯桀之語征虜旣沒存  
見夫人膠東受傷先慰遺腹甚乃豆粥厚意筇餌舊情珍甘盡於

大官邑實全夫福祿丈夫意氣隘貧賤之交故友共臥忘天子之貴一眚弗究入議可援不吝四縣之封豫防三公之責固宜杯酒釋柄宋祖愧其猜嫌凌煙圖形唐宗遜此恢豁者矣而諸將亦畏避權寵深執謙退青紫旣盛闔門養威丹鉛弗釋執經受學治家無驕貴之習牧民有愷悌之稱夫權勢之競有自來矣新故迭乘先後相貿乃能韜此武節以贊文教遜彼新進若忘元勳龍姿婉變常儷同翻之景蛇輔悲歎不懸宮門之書至於鄧氏各守一荻寶侯戒觀天文慕雕龍之世禪比珥貂之累葉上無怏怏少主之慮下無缺缺噲伍之心臣主俱榮身名並泰豈非三代以來曠世罕覩者乎夫少康配天僅一臣靡周宣補袞惟藉仲山茲乃埽紫色淫龍之鋒撲赤眉青犢之燄朱火沈而更暉蒼生擾而仍定鱗集響應翼附爭奮興布衣而膺袞繡易武弁而調鼎鉉卒使南宮

圖象易世念雲臺之勲中興佐命羣論疑星宿之應偉烈盛美輝  
灼世禩足使追往者繩其軌詔來者慕其迹而圖畫斯煒贊頌尙  
闕亦尙論者所不能已也乃依其本第序而贊之太傅高密侯鄧  
禹大司馬廣平侯吳漢左將軍膠東侯賈復建威大將軍好時侯  
耿弇執金吾雍奴侯寇恂征南大將軍舞陽侯岑彭征西大將軍  
陽夏侯馮異建義大將軍鬲侯朱祐征虜將軍潁陽侯祭遵驃騎  
大將軍櫟陽侯景丹虎牙大將軍安平侯蓋延衛尉安成侯銑期  
東郡太守東光侯耿純城門校尉朗陵侯臧宮捕虜將軍揚虛侯  
馬武驃騎將軍愼侯劉隆中山太守全椒侯馬成河南尹阜成侯  
王梁瑯琊太守祝阿侯陳俊驃騎大將軍參議侯杜茂積弩將軍  
昆陽侯傅俊左曹合肥侯堅鐔上谷太守淮陽侯王霸信都太守  
阿陵侯任光豫章太守中水侯李忠右將軍槐里侯萬修太常靈

壽侯邳彤驍騎將軍昌成侯劉植橫野大將軍山桑侯王常大司  
空固始侯李通大司空安豐侯寶融太傅宣德侯卓茂贊曰

列宿垂芒羣雄鬥野神應赤龍帝興銅馬矯矯虎臣愔愔大雅賞  
饒蘿圖慶延茅社鳥則擇木臣亦擇君冠負日月威奮風雲避爵  
辭寵建纛修文偉彼交泰集茲大勳燎火炎炎佳氣鬱鬱扶桑未  
融孰先捧曰於惟元功實首高密髫年遇主弱冠投筆帷幄更籌  
鄧侯再出響震關河師行紀律龍章雖褫鳳采無匿寵冠東京名  
保元吉絳侯少文德茂安劉廣平鸞彊亦兼勇謀晚定巴蜀先平  
薊幽鬼語擊手蛙胷洞矛主諒赤心兵行黃頭馬尾勢岷龍驤功  
收反敗爲勝以樸勝浮僞檄謫眾大勳誰侔武節焱逝必先文事  
膠東勤學將相之器高言漢中際會幽冀眷此解驂期爾展驥被  
羽克敵傷夷驚帝論功不言剽甲佐治勳少方面經明大義兩虎



既和三侯參議虎生三日雄姿奮揚驥志千里歷塊超驥好時按劍童年耀鉞抗論河北決策南陽擊賊破胡走岑降張有志竟就其鋒莫當比烈歷下剋平東方三世爲將威聲煌煌古者將才皆由循吏龕敵以威澤民以惠雍奴堂堂文武兼備朱旗頰山赤伏踐位比蕭堅鎮效藺屈意食輸驪駕諫挽龍轡嗜左成癖借寇斯治民懷仁恩友感厚施江湖萬里荆益二州漢祚雖復皇風未柔舞陽後服歸德早侯追戎秭歸圍豐黎丘既下朱鮪乃平黃牛首破荆門神行漢浩秋毫不犯電鋒無留星隕一劍廟祠千秋河洛既定關隴後平烏合睢刺黃圖榛荆陽夏閒說主簿振名龍乘賀夢菟肩進呈推鋒上黨賜劍西征鼂池翼奮上林都成騎箕冀縣攀雲父城大樹之德宏我漢京蕭曹元勳亦緣故舊潛龍夙好拜簡先授鬲侯尙儒春陵邂逅日角讌語風塵奔走買蜜追念舍講

更係垂翅加慰受降見宥不存首功但取印綬改王去大偉矣上  
奏穰苴整肅郤縠雍容將略獨邃君恩以鴻潁陽全德直繩奉公  
口血破賊肘石誅豐覆蓋隴下投壺軍中黃門饗勞元甲飾終乘  
輿隕泗學士論功建立孔後卓然儒風炎精更輝實由二郡闕如  
突騎陷彼堅陣櫟陽安平北州之俊驃騎名崇虎牙力振南緯  
散西防煙燼衣繡白榮編竹斯奮叛臣齒擊瘡鬼臥鎮國共功  
人懷威信漢重吏事曹掾多才安成呼趨戟奮眾推人駭異貌  
生奇魁服叛魏郡犯顏天階東光獻馬舉族偕來焚廬載木傅弩  
銜枚赤丸先戮朱英何猜匪獨武略郡民見懷黥彭侯王乃出羣  
盜下江綠林雄名先噪朗陵運奇駱越爭勞益馬張旗謀同增寵  
揚虛歸心被甲龕暴嗜酒故達敢言匪傲將鳴龍劍志埽狼豕抵  
掌書上銷鋒詔報南陽諸劉實爲宗英安眾烈烈慎侯挺生射犬

早至驃騎後榮墾田難問詰吏何明全椒解印步負懷誠設壇祖  
餞期門從征困賊高壘傳烽井陘主念勤績邊思政聲帝信赤符  
官崇元武阜成之升野王是撫念功檻車平賊屯聚胡作水神乃  
爲渠苦祝阿賜衣拜將彊弩短兵殲魁清野因虜專制青徐威行  
齊魯惠此貧弱清彼盜藪中國鼎沸北夷始驕高柳煽亂塞榆蕭  
條參遽洸洸中堅自豪廣平鷹揚沛郡虎超狼煙夜炤鴈塞天遙  
屯田旣成虜馬失驍昆陽毀族江揚功高始憊盟眉終榮珥貂逐  
鹿紛然從龍貴早疾風震盪誰爲勁草合肥左曹洛城先埽孤軍  
無援食菜自保富波慷慨河水天造瑞比魚舟士盡鳧藻不驚酒  
樽乃築亭堡潁川之良皆云國寶神龍失水幾困泥蟠九縣颺迴  
孤城獨完阿陵作檄炬火彌山馳騎鉅鹿斬鯨邯鄲蹇蹇中水忘  
親懷丹斷髮俗變禮容民歡槐里共事南陽力殫三傑協心熊羆

桓桓興邦喪邦一言乃判先幾難明朗照誰斷靈壽廷對乃決成  
算妻子弗顧神明攸贊昌城聚兵宗戚捍難心結痠揚系隆聖漢  
密縣死事河朔平亂擬彼傳斬俱爲良幹茫茫宇宙誰測天人龍  
蛇紛糾孰辨僞真山桑固始元鑒洞神或起草澤或興薦紳艱厄  
結好尊榮締姻南方不憂西域益振叱咤霄漢拔身風塵舉義知  
命齊膺上勳海水羣飛節義乃見覩幾蟬蛻識主豹變安豐惘惘  
神照獨電據地河右奉書漢殿觀符如鏡邪說不眩脫屣千里卑  
躬北面蹇人上天掌文自衍偉彼信效獨承殊眷盜據天位人飲  
狂泉風教日薄王靈曷宣斷斷宣德爲時大賢馬失不辨蝗災弗  
延汙濁力避龔鮑比堅終縈白駒重覩青天式閭立館新政所先  
化彼虺悍隆茲几筵日月麗天羣星相盪重離繼照六合同朗麟  
閣追美鴻臚促上赤縣澄清白茅懋賞如彼廣廈勢橈是仰如濟

巨川剗剗必倣臣靡矜驕主厚恩獎蒼赤正度丹青垂象

唐十八學士序贊

夫乾坤定位懸象昭焉天地再清大文炳焉是以蒼赤并度元黃  
肇闢熊虎之師旣偃鴻鸞之采斯振古者放牛修文息馬論道求  
才若不及改轍如弗遑豈重新進而棄舊勳務虛文而忘實政哉  
誠以取守殊勢匪孤恃力揆奮並用必兼尙文一談一詠柔彼虓  
悍之氣旣文旣博靜此囂競之風龍戰之世鳳鳥不鳴必推式閭  
之典仿佛築臺之意好畫龍而龍下買死馬而馬來維斯蟲雕亦  
偉鴻業矧於才配四友功參十亂祓飾大猷弼主明王之上繩矩  
前哲躋俗豐美之域者乎文墨議論冠獵狗之功梁邱望之圖麒  
麟之象文若迂而不可廢也士至賤而不可輕也黼黻非以華國  
乃致治之具也綿絕非徒榮古乃定亂之機也師處友處帝王之

盛節雅儒俗儒存亡之大界自干戈道喪庠序敎衰旣脫虎賁之劍不參鴻生之議挾書定律偶語東市腐儒是誚誦說見譏矜馬上之治而棄詩書逞豺離之雄而薄風雅以履絢爲迂遠以彖刻爲浮華珥筆者屏勿庸曳裾者斥勿進死士之壘驪山掩以機檻大儒之冠龍顏加以洩溺漢重圖讖以赤符論學魏尙刑名以清議爲戒士生其間何其厄哉且天之生才實難士之逢時不易芳蘭乃遭剪刈琬玉或就煨塵幸而時遇清明人樂振拔以彼際會可謂盛矣乃或顏驄白首主好武而臣好文盧生幽憂已尙儒而時尙吏鳳起摧其勁翮鴻漸鍛其羽儀方枘徒持員鑿莫入隋氏一代棄才尤多文帝胥吏之學罕通古今煬帝屬文自矜輕視臣下至於魚藻見詆燕泥致誅人君忌才士之名天子爭高選之譽方領矩步者轉於溝壑懷鉛握鐙者委於草莽睢刺之痛深矣文

學之厄極矣若太宗之握符膺籙倘亦天之未喪斯文乎帝以英  
睿之才兼文武之道脫金甲而吟宮體開玉山而論古義天策上  
將卓然儒宗幕府人才鬱爲時棟禮賢之館竹簡聚夫墳素直宿  
之廬芙蓉泛夫綠水比推食之誠日賜珍膳同布衣之義無間常  
禮不以倥傯廢講誦不以武略薄文儒迺文麗藻開一代昌明之  
運鴻律蟠采滌六朝輕豔之風匪獨漸漬瑋詞亦以商榷大政貞  
觀之盛殷周比隆若帝者豈非明於治道知所先後者歟而諸學  
士負其俊才逢此革命風雨雖急弗輟其音榛蕪肇開益奮其采  
卒能身際昌運見知眞主上者功參佐命擬莘野渭濱之遇次亦  
轡其龍文備石渠東觀之選雖其成就各異晚節或謬原彼始進  
益彬蔚一時焉昔梁孝好文鄒枚授簡淮南慕道九師著書陳徐  
應劉後園美其同乘任范沈謝西邸隆其上賓辭采雖工勳略未

振徒逞雕龍之辨弗逢附鳳之期比其盛美皆有弗逮遂使翹材之地取譬於三神瀛洲之登豔稱夫千載推其位次同符漢代元侯著爲圖象絕勝鴻都門學此則於斯爲盛見周武亂臣之多生不同時慨沈炯通天之表者矣立本之圖久絕舊府褚亮之贊亦罕傳本乃感其事序而贊之大行臺司勳郎中杜如晦記室考功郎中房元齡于志寧軍諮祭酒蘇世長天策府記室薛收文學褚亮姚思廉太學博士陸德明孔穎達主簿李元道天策倉曹參軍事李守素王府記室參軍事虞世南參軍事蔡允恭顏相時著作郎攝記室許敬宗薛元敬太學助教蓋文達軍諮典籤蘇勗贊曰運際鼎革人思贊參眞主握鏡英僚盡簪晉水飛龍秦宮夢驂方州剖豆大厦收枘煌煌太宗道兼經緯武節焱逝文辭霞蔚梁苑才多燕臺士貴宏茲人網奠彼鼎沸瑤池萬里必驂驂驅巨川茫



茫誰爲楫舟惟房與杜能斷能謀比烈蕭曹追蹤召周位重鼎鉉  
機深帷幕堂堂宗臣蹇蹇廟略尸諫晚激羽翮先落笙磬同音並  
司筦鑰于公作相亦進元僚諫苑賜緡崇階珥貂脫囚並列讓田  
同朝晚厄牝雞終殊李貓野鳥爲鸞諛多直寡懣矣蘇公乃蒙優  
假爭禮追武諫獵比馬高議披香聲振殿瓦名父之子實惟伯褒  
露布馬上雷轟虎牢黑闥策勳黃金勵操火色騰上英華早凋宛  
宛長離出自俘虜希明懇愍軍中裨輔賜馬嘉才格虎諫主有子  
象賢晚困鸚鵡白刃可蹈乃見忠貞思廉正色唐公卻兵虓虎氣  
奪散騎秩榮卒業二史抗義九成興國大計首在崇儒虎觀論道  
鴻都聚書德明仲達蔚爲雙珠拜牀是恥避地匪迂三敘博辨干  
言閭記偉彼耆碩開茲文治淵哉釋文卓矣正義焜耀三唐沾丐  
百禩元道英英短簿之職旣脫虎口乃攀鳳翼大義裁督艸書始

激初懼非辜終美風績六朝之季世重甲門高下喧競南北糾紛  
倉曹贍學氏族洞源肉譜可畏腹笥同論永興胸胸帝稱五絕貌  
若儒謹中乃抗烈蛇穴獻言禽荒納說非徒毫翰亦補袞闕明鏡  
蒸食乃損其真胡彼雅士遣教宮人允恭嶽嶽晚作參軍爵拜洗  
馬書希獲麟顏籀巨儒孰爲難弟睿也博聞亦游朱邱王廷抗爭  
春官秉禮二陸齊稱雙丁壹體孔雀雖毒不掩文章華藻萎蕤乃  
非棟梁敬宗晚謬文采自光多聞帝邱妄議朝堂濟濟河東斐然  
三鳳鵠鵠發聲奇響驚眾款曲弗伸機務是綜專掌文翰亦稱國  
棟文達岐嶷出自天然墨守弗尙青藍競先當仁不讓經義是宣  
官授助教館登崇賢慎行有名人美博學選尙穠李材翹械樸王  
姬下姻帝子寵渥殿彼直廬婉變戎幄藹藹多士槃槃大才黻黼  
月日經綸雲雷耀奇蓮幕擬迹蓬萊滄瀛路近暘谷天開士競攀

龍主思市駿照乘方珍連城比俊千載一時百世思奮蕪詞補遺  
盛美垂訓

嶽麓書院六君子序贊

夫蚩蚩者氓非學不以晏晏之化匪誨弗成三五迭隆富教並重  
象魏懸法先於教刑之鞭雉門修儀深於徇路之鐸浚明以下實  
分厥猷鄉老州長獻其賢能黨正閭胥掌彼觥撻陶冶染學蹈德  
詠仁是故明王建學辟雍頌其鼉鼓賢侯修舊泮水美其鸞聲隆  
周以還斯道罔紹學校衿佩有佻達之歌尼山木鐸興儒生之化  
教養分爲二事君師不出一人輔治者不以流失爲怪而徒困於  
簿書典學者無復陶鈞之權而孤鳴其佔畢曰儒曰吏判然殊矣  
夫法令滋章何暇興治文具無實徒爲美觀上之用人不皆達道  
之才下之作吏且懼此事之廢武城絃歌乃成絕響郡國庠序亦

云虛設是以善爲政者知一身之不得兼也則求人以訓之知鄉學之不足恃也則擇地以安之漢吏雖良實刀布於太學梁文旣盛頒經籍於鍾山良以地必遠羈塵師必求耆宿山水之契深結冲襟誦絃之風潛移鄙俗故董生下帷之教勝於公孫立學管寧遼東之化愈彼鴻都觀經也然而官守攸分扶植蓋寡穉賢士且議鄉校之毀蕭何元勳未遑庠序之事又況術本申韓酷比張杜風塵走俗誰知瓠葉習儀牒訴倥傯豈願琴歌旣斷乎有宋以來書院日盛繁此南楚首推麓山自濂溪卜居龜山論道康侯表其令範五峯嗣其音徽晦庵南軒講學大盛瀟湘之地有洙泗水之風焉若溯荆建之伊始戒數典之勿忘如朱公者其首庸也且夫莫爲之前則宏規弗啟莫爲之後亦式廓弗增自宋南遷暨明中葉桀犬吠聲倡道學之禁下虎其門啟朋黨之爭而諸君子或

復舊規或闢精舍翹材之館首聘名儒瞻學之田大庇寒士鳳鳥  
不來鴻鸞之采自振惡草當路芝蕙之馨益遠不以戎馬忘諷詠  
不以律法廢詩書遂使杞梓翹秀奕世奮其風徽芷蘭播芳中原  
恕其文獻然則啟蜀才者仰文翁之澤開閩學者推常袞之賢固  
當百世不祧名山配食者哉夫誰嗣之頌興夫興人循吏之贊出  
自司馬決漳水者猶流連於史起伐枳棘者尙謳吟乎岑君矧乎  
振三湘之人文維萬代之風教則銘其偉烈勒於貞珉歌詠功德  
亦後學者之事也乃各述其事而贊之宋四人朱公洞周公式李  
公允則劉公珙明二人陳公綱楊公茂元贊曰

鴻洞天開熊湘地偏位鎮火維靈鍾玉泉赤沙遠接朱鳥高竊芝  
蘭星燦杞梓雲連麓山峩峩羣賢是宅昔維古寺今乃講席金玉  
聲振鐘梵響寂禮堂肇興靈境斯闢筆路藍縷斯爲首庸慮始攸

艱孰振英風赫赫尚書講堂是崇丹櫺飾雲畫棟偃虹茫茫碧山  
化爲儒宮荆棘手剪榱桷材豐潛虬在淵一方自潤璞玉蘊輝名  
山斯鎮猗歟敎授壁立千仞鳴斯木鐸蔽彼金印曠舍宏開成均  
職進祕書允升名德斯振文武揆奮經緯無殊母將豹韜飾此鴻  
儒卓哉潭州恢此精廬九經並興三稅是除毀家紓難肆活枯魚  
投戈講藝場廩白駒煌煌大賢道冠天下推彼餘力勦茲大厦解  
排異端志復中夏鐫文垂鴻論道息馬淵源自殊模範非假緬彼  
安撫夫惟大雅隆基莫勦鴻規弗升盛美難嗣駿聲曷承自宋迄  
明曠遠無徵陳公泣止百堵皆興寶山大開髦士鬱蒸損爾清俸  
貽之準繩千秋鉅儒實爲循吏表章絕學光輔盛治英英貳尹斯  
文有寄廢墜是修權豪弗避雕甍塗丹隆棟飾翠耿彼輝烈銘之  
巖鳳濟濟羣彥修廢抱殘錯石攻玉障川迴瀾鳳集南嶽引聲振

翰運有興廢斯人不刊祠名六君人惟兩代誓宗合祀石室遺愛  
丹荔俎薦翠琬銘載型鏡無爽芳馨永佩

雙清圖贊

并序

蓋聞甘泉畫象用表閼氏之賢安定圖形爰標女宗之號梁國高  
行曾鏤武祠楚昭貞姜亦光漢石是皆銘徽彤管襮懿青珉傳故  
事以詔後人旌遺芳以風淑女然或專持峻節未捐不貲之身或  
獨往幽宮非有并命之慘若夫一門風烈負石偕沈兩代清貞褰  
裳並逝豈非邦媛之奇厄人倫之偉坊者乎雙清圖者陳君幼梅  
觀察同年之祖母蕭老夫人及母黃太夫人殉節之事也方其靜  
室隨行高堂侍坐絲纈車而共理蘿補屋而常牽遊子遠行爲負  
養親之米婦姑同處或敲隔戶之棊向使蛩駘相依龜龜弗迫則  
亦扶持出入保抱嬰媿修淑人不忒之儀奉君子能勞之訓已耳

無何銀槍夜焮繼輶朝奔爭探赤白之丸莫定蒼黃之局江風慘  
淡如聞鶴唳之聲滄海橫流將發牛車之歎餘姚書佐未免仇離  
趙郡良家並遭驅略黃太夫人奉姑出走攜息逃威冀避綠林之  
鋒獲全青松之潔乃伶仃弱步未及趨風而旗幟漫山已同驚電  
欲全性命恐求生以害仁少緩須臾慮祈死而不得迺捐文祿隨  
躍清流傷厓上之啼聲未逾周暉愴塘中之墜影竟賦懷沙視死  
如歸眇然輕絕此則心雖古井一池無不起之波瀾化到冤禽千  
古有難填之憾海矣嗚乎白頭同命黃口誰憐碧水無情蒼天何  
酷幼梅觀察與其介弟小梅部郎痛慈竹之弗榮嗟蓼莪之蚤廢  
昔求沈玉閨面貌之如生茲擬鑄金庶音容之宛在因修譜牒追  
繪斯圖悲風生於微綃古淚漬於盈幅宇宙慘黯神愁鬼哭之情  
山川蕭寥地老天荒之象繫昔叔先號慕志華陽之文麗玉篴篥



傳渡河之曲渤海夫人之使智井甘沈廬江小吏之妻清流忍赴  
惟誓心於白水故畢命於黃泉懿茲雙清勝彼孤潔固宜疆臣入  
告風采輶軒

天語褒嘉名題綽楔寵光高於梁嬖行義烈於桓嫠又況朱萼連  
枝鳳齊飛而競爽黃封三錫鸞銜誥以增榮不誠足慰逝者之哀  
遺方來之式哉夫邯鄲曹娥之碣厥有銘文中壘列女之圖曾加  
贊語敢援古義以闡幽潛贊曰

玉折逾瑩蘭焚彌烈福以生庸名以死潔匪唯一死迺有雙清姑  
旣抗節婦亦捐生湯湯洪流見者頸縮一躍同歸百身奚贖不隕  
厥間乃隕厥軀冰雪弗變丹青豈渝鮫女有珠炮媧無石缺憾天  
多淚驚泉激霜色皜皜竹痕斑斑推賢巾幗足立懦頑二字標題  
一家芬郁石窳縈封清臺高築蒼涼楮墨中含古悲蛟宮不返鶴

夢何歸義懷清標辭漸黃絹昭茲令儀貽彼貞媛

徵刻朱文端公藏書十三種啟

昔天子纂定六藝分臚四科武城傳其統宗西河發其章句而天  
圓禮問洪纖不遺灑埽應對本末皆具是知大學之教匪尙夫空  
談小學之功不專於故訓乃自東京宗高密南宋禰新安黨同妬  
真因陋就寡家崇鄭學今文之傳遂亡人埒朱門義疏之緒幾絕  
道墜千禩弊同一軌揆諸前賢之意詎必專己自封且紫陽晚訂  
禮經於司農未敢置議誠以據禮求理斯實者非虛沿流溯源斯  
分者見合乃師智自聖妄談龍象之禪嗜古過拘誤信麒麟之鼓  
操戈互競佩劍相笑不有魁碩奚從折衷高安朱文端公學爲帝  
師勳具國史明經青紫俯視羣平皓首丹鉛上攀伏董一行作吏  
無廢下帷之勤窮年焚膏乃開講幄之蘊盛德赫亘蚤耀寰區遺

書圭臬足資來禩必推其略有可陳焉公以八卦之分肇自犧畫  
十翼之作搢於龍蹲而輔嗣清言徒供塵尾之執圖南異學忽有  
龜書之授羣言淆亂折諸聖人三爻夢吞表其獨見殫極理數引  
申朱程不載河洛之圖尤徵別裁之旨作周易傳義合訂十二卷  
素王有作天子之事旣膺赤鳥之命爰奮獲麟之筆左氏凡例或  
疑後增當陽謬悠云承舊史兼綜三傳標金鎖之名獨抱遺經逞  
玉川之臆公篤信衮鉞旁參權衡錄其事實大義不虛尋其褒譏  
微言胥顯作春秋鈔十卷夫子曰吾志在春秋行在孝經長孫諸  
家顏本斯授魯國三老口傳已佚河間售偽司馬獻疑猥云孔壁  
之文乃有閨門之句公用草廬校定之本附易齋管窺之篇意取  
兼通間參補義作孝經朱氏學一卷禮也者人倫之軌範經術之  
鈐鍵蒼姬應運爰修官禮之書元聖立制實參夏殷之法緜蕞儀

習赤龍擊輿石渠制稱白虎議奏高堂傳禮小戴述記鄭注陳其略孔疏發其詳而殊時異宜聚訟多惑昌黎好古猶曰難行正叔集說未能悉定公本徽國之家禮著爲節略宗臨川之纂言抒其心得蓋朱吳功兼攷證非飾虛車文端學主朱吳兼收斷簡斟酌漢宋取其可安貫通古今要諸有用性道之旨不薄夫容經曲臺之辭未湮於理窟作儀禮節略二十卷補禮記纂言三十六卷又以信都之記文由叔孫之撰置黃門之訓瑕不掩瑜藍田之書禮通於易家範述宋禮翼纂明方諸內則少儀抑亦支與流裔能修質行何讓萬石之純若揚民風詎止一門之端校定大戴禮記顏氏家訓張子全書溫公家範呂氏四禮翼五種史肇西京爰紀循吏記出東觀始標名臣龍門搆儒林之稱魚豢改儒宗之號全史汗漫未易披尋非藉篇章曷由趨步公喉衿羣籍萌抵百家擇所

依歸加之論贊文章道學息門戶之爭牧令公卿取龜鑑之法編定歷代名儒名臣循吏三傳盛矣哉言爲模範近而易行文如菽粟美而可飽禮堂寫定無憾事之畱考亭通解有功臣之目錫瑞主講經訓獲覩藏書鑽仰靡窮服膺無間乃知衛武耄學斯膺睿聖之名蕭傅立朝不墜經生之業而赤眉挺亂青編煨燼羽陵蠹化莫問秦灰竹簡書亡難尋汲冢今將重付剞氏廣遺後賢當懸國門之金庶貴洛陽之紙名山之藏可發共十三種而非奢經世之學在茲更千百年而不朽

重修屈賈合祠啟

夫蕭艾滿握不識迷迭之芬鳴皋盈庭反驚歸昌之律俗訖所見則罕覩者非珍體安所習則言奇者見棄卒之閱世論定風流乃彰說夫煙消馨烈彌茂蘭蕙旣謝惆悵九畹之間鳳皇高翔徘徊

千仞之下而留豆蕪曠丹青歇剝望古之士慨其閔矣長沙古城  
太傅故宅後以靈均共祀合爲屈賈之祠誠以磨蝎同宮囚鸞比  
翼曠世相感乃投湘水之書擬人於倫遂合龍門之傳若乃稽其  
行事比其際遇異同之迹可略而言夫黃棘策施藍田兵辱懷王  
不悟見欺虎狼之威頃襄忘仇有愧大鳥之對悲感亡國義激懷  
沙太傅生遇清時何宜痛哭不知虞廷交儆猶戒丹朱鄒嶧責難  
不如堯舜況其時黃頭並進亦傷聖德絳侯少文初非賢輔中行  
反覆何異張儀三犖厝薪詎殊戰國愚諛見謂安治智士所爲累  
歛大息之書非過激也三閭楚之同姓正則裔出高陽邱墓所依  
莊舄病猶思越肺附旣託非子死欲存韓堵敖不長休戚當共太  
傅洛陽年少宜異宗臣不知知己之恩武侯由是感激國士之遇  
豫子報以殺身當其時宣室求賢歎爲不及列侯就國發自下僚

議任公卿始若左徒見用毀生絳灌繼似上官進讒竊比之意非  
不倫也嗟乎江魚腹葬神恨驂虬鵬鳥愁生魂隨墮馬問天不語  
空訴牢愁弔水何知難明忼慨遂使女蘿薜荔九歌悲山鬼之遺  
沅芷澧蘭萬古稱騷人之國縣世寢遠靈宇就頽蕭條濯錦之坊  
寂寞陶公之廟古柑萎絕莫畱橘頌之香舊井湮沈慨想王明之  
福念茲芳烈宜用尊崇所當祓飾荷堂塗丹蘭橈崇璇題以納月  
新傑構以偃虹遷客寓公並秩豐祀楚豔漢侈更薰古香庶將丹  
荔黃蕉披髮向大荒而下寒林秋草識我昭詞客之靈表風教於  
茲邦益深愛國忠君之志仰芳徽於往哲非徒擷香拾豔之才云  
爾

滬上寄都中友人書

故人天末長安日邊五噫出都單車就道長謠興歎不可說也黯

天沙黃匝地草白車行三日乃抵析津滄桑變遷景物殊異海濱  
廣斥化爲鉅鎮坐待數日始登海舟廣半江船地小客眾牛驥同  
皁人禽對巢海口逼仄荻蒿填淤其中狹處僅容一舶停輪忽止  
候潮乃行如此數時不及百里想見天塹設險關鍵甚堅但使重  
兵嚴屯夾岸疾擊雖彼豕突詎得鳴張哉日午出口舟行始暢巨  
浸茫茫漸失畔岸空水一色渺無纖塵洪濤連霄並絕飛鳥惟東  
北一髮青營諸山時見翠光隱躍波際傍山而上厥名煙臺昔日  
戍樓今者海市觀成山之罌之壯思秦皇漢武之盛津通牛女難  
乘博望之槎地近蓬瀛詎憾劉郎之遠乃睠北顧感慨係之維時  
海天媚晴颺颺息響登艫曉望推蓬夕眺朝暉暗升憾隱夫積霧  
夕景紅墜驚躍夫奔濤海色霑袂染鬚眉而純青波光盪胷滌塵  
垢而俱化仰首則天水噴薄長嘯則蛟龍震驚斯宇內之窮覽客



遊之豪致也俄而元波觸天黑浪灌日慘淡墨池之水深黝金壺  
之汁爰自成山驚乎巨洋覽滄瀛之大全極天池之深廣乃有大  
聲起乎水上噫氣發乎土囊颶風橫驅海波僵立鼇極爲之摧陷  
鯢溟疑於傾覆曹王兩輪之艦盪如葦杭南人萬斛之舟飄若芥  
粒火力之猛強爭而退回汽機之奇反激而倒縮震蕩竟日時虞  
傾沈同舟諸君面罕人色覩山陸之勢則賈客驚號聞雷硯之聲  
則婦女夜泣非杜陵之情惡乃病嘔臥異昌谷之苦吟幾吐血  
僕雖苦眩暈意氣自若以爲文考之才子安之傑且不免葬魚腹  
沒蛟宮惟此忠信足傲波濤死生命也何容憂懼乎槎山而下水  
色漸清幸脫風波始抵滬瀆滬上風雜夷夏地分中西歌吹聾耳  
金碧眩目妖姬競豔車行門風鬼火分紅夜朗逾晝綠睛赤髮似  
入王會之圖左帶沸脣如覽十洲之記自疑此身頓入異國矣足

下揚聲天衢高步日下動履多豫著述益宏士衡入洛茂先賞其  
瑋辭寶王至都常何薦其鴻筆旣思振奮亦擴聞見奚必名山養  
性仰屋著書述節信之潛夫詠泉明之歸去哉略述所見藉塵彼  
觀征行恩恩詞不宣備

與李荔蓀書

夫雄千雌鎔睠神物之終遼松茂柏悅欣共氣之相引誼篤於故  
則白頭如新情孚於同則丹慊並照韓孟追逐有願爲雲敏惠相  
思夢尋迷路是故蟲鳴螽躍和以聲也虎風龍雲觸以氣也寄通  
靈臺之下遺跡江湖之上賢達古義不偉爲烈歟足下冰堅鍊骨  
鏡古照神處餐霞之負勵映雪之志高文通坐視漂麥遜此專勤  
朱翁子行歌負薪忘其困悴果能揖讓終賈含咀陸潘聲光隱然  
羽翮益奮邇聞吾鄉啟講舍聚鴻生各抱遺經紹明絕學足下諸

子驂靳其間談天雕龍齊稷下之論議林宗賈虎漢太學之聲名  
相與挾張鴻文被飾旨議變楚風之樸僊關斯道之榛蕪甚盛甚  
盛鄙人不才僻處天末資章甫於文身之國奏雅琴於鳥喙之君  
聞見日陋性靈彌錮復迫塵網往來吳越呼吸蛟龍吟嘯鷗鷺溷  
跡漁商之內鳴榔江海之中湍瀨驚心煙霜楚矚碧山曉矗則神  
飛重霄白浪夕舂則魄墮滄海若夫客星高士潮神大夫釣臺歷  
江奔濤轟石時或租船詠史澤畔行吟弔山川之非昔懷古人而  
不見雖足濬發神識振觸積感然韁鎖繫其前風濤震其後鳥集  
森逝衡流方羊間陳侂詞無關大雅是則專門之業自此而墮吾  
精易銷因之坐槁者也頃還婺城踰伏山谷歲聿云暮風悲斷肌  
名山洞天無復石羊之蹟中原文獻非同泥馬之時塊然獨居侘  
傺誰語慨此殊俗彌懷故人昔與吾子弱冠慷慨獬兒總角文公

理於當年雞聲起舞恐祖生之先我爾時壯志上千虹蜺方自以  
謂王登貢喜我黻子佩不難蕩海嶽凌滄洲矣何知羽翮莫奮鋒  
距靡加長謠噴薄華色漸減子壓苜蓿坐子敬之青瑣僕嗟轉蓬  
懷胡威之匹絹曹子桓行年三十早類老翁潘騎省已見二毛彌  
傷秋興足下視僕豈嘗纓情好爵羈志浮榮者哉願嘗以爲君子  
之道或出或處聖人之行一龍一蛇抗志千秋必有一得今進不  
能雲臺橫議獻一說以策名清時退猶冀名山著書成一家以傳  
之後世乃徒悠忽以苟歲年空效梁生登岳之謠殊深孔父逝川  
之歎久欲作報而情緒殊惡操翰復輟乃至再三知君惓惓略陳  
近况望崇明德益愛春華慎護波潮更俟清晤湘江草綠春水方  
生將速歸艍重申款讌

與王懷欽書

握手都門黯然一別蓬飄梗斷芝焚蕙歎感落羽之分飛念良朋  
之情重地仍碣館徒驅馬以歸來人異河梁驚黃鵠之遠別回憶  
十年舊雨樽酒重逢相聚月餘倏同勞燕前讀大集見青門酒罷  
身如葉之句慨焉傷之何圖一朝彼此同轍山長水遠別久會稀  
覺故人之跡遠於長安離索之感深於罷耗矣未審足下何時出  
都或杖策南邁旋軫湘江或囊筆遠遊浪跡滄海所居僻左書問  
致簡言念君子實勞我心想道履清娛素顏豐勝願善珍衛以俟  
清時勿顛顛以戕生勿苦吟以伐性憂天無益鑒杞人之大愚仰  
屋著書問侯苞之誰是惟優游嘯咏跌宕湖山庶貌悴而神不傷  
身勞而性仍逸此僕所自適亦願足下共適之也去夏返越仍走  
山谷潛挈經術略有咫聞惟良書獨擁疑義莫析鯨鐘響閤徒聞  
寸莛之撞龍劍鋒藏不見鏤鄒之合固已塊然獨處念結千里又

况塵俗攖其前奔走迫其後今春急欲旋里亦恐難以決行足下  
踪跡又復無定道路日遠良會何時他年計偕再當相見於京師  
耳

出都與程伯翰書

金臺聚首碧海回舟渺茲墜歡翩似秋蒂言念君子道履清豫浮  
湛郎署策名天衢子雲沈默草元黃門臣朔恢奇避世金馬大隱  
朝市處道龍蛇邇者卜居踪跡何所自別之後振策南邁沙黃楚  
矚卉綠倣心舍輿而舟撫彼逝水顧瞻帝京杳若天上馬來冀北  
增價幾人鵬徙南冥搏扶終曠巨海可涉神山匪遙意將褰褰忽  
爾風引何云神仙自致漂蕩蓬島憾遠狂飈無情遽轉側至滬而  
儔類俱困矣遂辭同侶悵爾獨遊旣感離索益屏興賞水碧照夜  
橋紅飲霓南中景象未異前日而新草慘色鳴蛙聒聲耳目頓異

未識何故僕以下材幸獲一第卽此耗耗詎云怨尤惟念故鄉可懷歸計莫決家君作宰廉吏難爲毛生捧檄非無顯揚之思胡子懷絹莫拯清白之困是以觸同藩羊無能進退顧此櫪驥未免長鳴耳伊昔與子爭驅藝苑比瑜策之弱冠期王貢之推舉何圖顏駟爲郎壯歲已往伯鸞適越長謠空憤安能不撫豫州之髀泣宣武之條哉勉旃自愛不盡欲言

宣平與黃鈞甫書

由婺城至宣平一百餘里山川蕭條無復佳勝而塵世隔越亦遺垢氛木末窮煙筍將躡露稻香溢隴疑聞芝蘭蟬聲曳林勝憂絲竹石似臥虎怒蹲山崖松如渴龍俛吸澗水農夫荷鋤若白鷺之翹足明霞散綺比朱鳳之布裘蓋有桐廬之清無雷岸之險焉若夫曷日亭午炎歊漲天風沙濛濛浮光赤黃艸木雜沓門影青碧

曠野絕迹罕聞鷄犬之聲前行欲迷但覩荆棘之象何嘗不悲楊  
子之歧路歎阮公之窮途至於微風送涼薄霧褰夕水積雲氣結  
爲輕綃山含日光若隱半壁空翠欲滴溼衣無聲野花送香極視  
不見斯亦足以表靈賞豁沖襟者矣更有丹崖一角碧玉半泓翠  
竹數莖朱荷千柄則尤騁懷遊目想蘭亭之清風怡顏容膝慕栗  
里之高致夫吾人遊心埃壒之表抗志煙霞之上靈響遠結懷五  
嶽之勝遊元化可師覽九仙之丹訣慨彼行役乃嬰世塵對此茫  
茫安能鬱鬱魚游盆盎寧同濠濮之觀鳥困籠樊終戀山林之養  
將欲與君濯纓清流垂釣空谷時不我與翹翮摧屈何日當尋遂  
初之賦歌歸去之辭平行道所見聊述鄙忱